

# OMUTHANLA

## MULIPA-OOWAAKAMELIWA



Atthu anci-ene anwereiwa. Nkinwerya oweemererya othene aya em meta emosa. Masi, nwiriyane.

<sup>2</sup> Vekeekhai kootteeliwa murima okhala-tho va, ohiy'ula, mw'autitooriyu ula ooreera, eriyari ya nikhuru nla nootepa oreera n'atthu. Ni hiyo naamuvolowa, vale, okathi vakhaani ovinre, atthu yeemenle-ene mphironi khwiira wira khayaawerya ovolowa. Nto miyo khwira, "Ahe, khino kinimoophwanyeryani opuro." Vano khuhitthuniheriwa orwa. Tivo kinnoona othunku hiyo ohikkhalana opuro oniphiiyerya wa yaawo. Ehimmwe wira nipuro na vathi naahisarya, nave. Nto vano hiyo ninnoona othunku mwaha wa yeeyo. Masi nootteeliwa murima okhala va, ni nootteeliwa murima woona nikhuru nla nothene n'arumeyi, alipa a nakoso va, ni nyuwo othene oorummwa a mapuro oohiya-hiyana a mulaponi.

<sup>3</sup> Kaahikkhalana oreeriwa wuulupale w'olavula voosiis'ula w'olyani wa voosiisu, yeeyo miyo kinuupuwel'aka okhala nttittimiho olavula ohoolo w'atthu oophenteya. Kaalavunle mwaha wa: *Malaxi Khanrowa Orithi Ni Etriku*. Nkaawenrye omaliha. Ni khawaari o—ovonya wa munna. Owo aahiphavela wira mulipa-ooweettiherya muteko anihiiye okhala-tho vakhaani, masi owo khuhitthuniherya tu. Vekeekhai kinnixukhurela yeeyo, Munna Demos. Eyo ti yooreera, yooreera saana. Vekeekhai kinnooxukhuruni mwaha w'oreera wanyu murima, khula mmosa. Masi khanaatthuniheriwe tu. Tivo naahaana tu o—naahaana omaliha. Miyo kinootthikela yoowo, okathi mukina, wira kimalihe yoowo: *Malaxi Khanrowa Orithi Ni Etriku*. Muhiiwa saana, nyuwo mwaari vaava? [Muthukumano oniira, "Amen."—Mol.] Kinroromela wira waahikhala woophiiyerya wira wiiwiwe saana.

<sup>4</sup> Vano, koosuwela, ohiy'ula, wira yookhala epaineeli, nave, tivo nkinthuna wookhalihani va vanci-ene voophiiyerya wira muhaleele yeeyo. Okhala wira, vekeekhai kinoona wira ele yaari efayita w'a—w'atthu oowaamini w'ePentekosite, epaineeli ile noonaly'ahu ohiyu uwo. Nikhuru nle nooreera n'atthu, iyaakhulelo sooreerexa, soolikana. Saahikooniha oreera saana vekeekhai, woona yeele. Kinroromela wira Apwiya anooreeriha, ohiy'ula. Ni khula onoona, aamini. Iwo p'uvekela waka w'exariya.

<sup>5</sup> Ni mihupi sinci-ene siniphiiya, olelo, sa ekureyu ni atelefooni, s'atthu anci-ene anivonihiwa vamuthukumanoni vaava. Miyo

nkireere otteeliwa murima mwaha wa yeeyo. Wira, eyo ti wii, waakhaliherya aretta, owo kinoohimya wii ti muteko aka.

<sup>6</sup> Miyo—miyo kinwela va wira kilaleye. Miyo, moosuwela, miyo nkihiyo mulaleyi. Masi miyo, ni yeela, malavulelo aka a oKentucky, “his, hain’t” ni—ni moolumo awo othene, tivo miyo—miyo nkinwerya olavula ntoko ele eniihan’ahu mulaleyi a vano oolelo. Miyo—miyo nkaakhanle okuxaka nipuro nenlo, okhala wira nki—nkisomme.

<sup>7</sup> Masi kaatthuna kaahimeerye akina, ele ensuwel’aka ya Yeeyo, wala ele enoon’aka wira kinnisuwela ya Yeeyo, w’akina, moota kiixuttaly’aka, moota Owo okhanly’awe wa miyo. Owo ti ekumi aka yothene, sothene kaakhanly’aka owehereryaka okhala, ni vanci-enexa ovikana sitonko aka wuupuwela, wira kaakhalakhala kikhalanaka mpatthani, vanci-enexa, elapo ya vathi, okathi waary’aka mwammiravo. Masi vekeekhai kinnixukhuru mwaha w’apatthani aalupale olelo.

<sup>8</sup> Miyo ka... [Munna mmosa oniira, “Vannirika vakhani wiiwa ottuli iwe, Munna Branham. Mukhuveele.”—Mol.] Oh, kileveleliwe. Ki—kiri oorakamela vakhaani va, nipuro nimoso, owo oroohimya.

<sup>9</sup> Vano, wira nikelele muteko naanaanoru, nrowe nikhunle wii nisome vakhaani Yoolempwa. Miyo—miyo kweekwe okisivela omusoma Bibilia, okhala wira Awo ti Masu a Muluku. Miyo kinnaamini yeeyo. Ni kinnaamini wira Awo Masu a Muluku ahinivonya. Nto vano kookhalana Soolempwa kamosa-kamosa sikwerethiwe va, ni soolepa kamosa-kamosa kaatthun’aka ohimya, okathi vakhaani, khino minuutu miloko mixexe ni mithanu.

<sup>10</sup> Vano nto ninookhuma m’okathi wira nirowe noone-tho epaineeli ila yoreerexa ohiy’ula. Ni kinniroromela wira Muluku onoothikela ooreerihakani voohihyererya. Ni koosuwela ethu murin’anyu wira. Ni kihanle weetta mukwaha kirowaka oTucson, nlelo, ohiyu yoola, moone, vano mutthokelele. Mukwaha wa iwoora muloko.

<sup>11</sup> Ni kinoorowa ilapo s’okhopela, ni kihaana omwaakhela mwaapomphe a ettekuxa ya ncano woomwaleiwani voosiisu okuveerunu. Vano ki—kihaana orowa iwe. Miyo kaarimunteerya, nihiku nikina, nto awo khanrowa okupali hata “nnari” ntoko waakhula-tho vano. Ni kookhalana mukina a teetanu ni tifo wira kimwaakhele, ni wiilipiha waka.

<sup>12</sup> Tivo, nkireere oxukhuru mwaha wa mureerel’ola, ni—ni muthukuman’ola wooreera hiyo naarin’ahu sihinatthi opacerya mithukumano. Vekeekhai ola waahithananiha murim’aka. Nyuwo mwa nikhuru nooreera n’atthu. Kinniroromela wira Muluku onimooreerihani.

<sup>13</sup> Okathi muulupale nihiku nlo... Mwaaxinam’ole owoopiha oniphwanyaneya osulu iwe, aaitikinnye wAlaska wu,

mahiku vakhaani avinre, ovenxale-tho mwiil'awe voosiis'ula, waattamela, ohitto waattamela oWashington. Owo aamuwerya orwa mpannte yoola, vookhweyaxa. Nto Eroho Yowarya yakileela-ru voomalela . . .

<sup>14</sup> Ookhala onaakhulaka . . . onikikohaka yeeyo, "Enrowa wiiraneya wenno, Munna Branham?" Nnari, miyo nkisuwenle eyo. Miyo nkisuwenle tu, mpakha kisuwenle-ene. Eyo ti ekeekhai.

<sup>15</sup> Miyo kweekwe kintthuna kikhaleke naxariya ni nyuwo. Nkinrowa waakanyerya paahi, okuxa ankhili kamosa-kamosa, wala etthu, etthu enaamini aka, wala etthu siiso. Kooleelani-ru, enimwiiraneya. Ahe, Owo ohaana okileela, toko, vano nto kinimooleelani. Miyo—miyo koosuwela wira olumwenku wothene ori mmukhaleloni w'othukumela. Hiyo nri okathi wookiserya. Masi etthu emosa emphavel'aka okhala . . .

<sup>16</sup> Munna Shakarian aahimya ela voosiisu yoola, moota aavirak'awe muliinyani mwa mavekelo, n'ukuxa ittikitti iye sa mavekelo atthu ehinatthi owela, ni waaweha, ni woona nkhamana—nkhamana kaanaaleela etthu awo yaalepak'aya vale. Awo annilepa inamuna sothene sa itthu vattikittini vaya sa mavekelo, moosuwela, nto owo aatthuna woona paahi nkhamana yaari yoolikana. Owo khuhimya wira, wa imiya seene owo aawehaly'awe, khiyaatonko okhala hata emosa yoovonyeya. [Munna Shakarian oniira, "Nnakhala emosa yoovonyeya."—Mol.] Khenrowa okhala hata emosa yoovonyeya, moone, okhala wira, vakhalaru—vakhalaru wira Mulukuu. Miyo kaihelaru muhina mwa yeeyo, vano enoovonyeya vaavo vene opacerya wene.

<sup>17</sup> Mwanamwane mmosa muthiyana atithi awe akilante, anikiwiriyaana naanaano, aahikirweela, woohikhala khalayi. Owo aarooloha. Owo khwira, "Munna Branham, yooloha ela enihimya-ni?"

<sup>18</sup> Miyo khwira, "Nkisuwenle, munna. Kihaana ottemulela, Apwiya yakileela vale." Vano miyo khurowa khuphavela waakoha Apwiya, nto Awo khanakihimeeryeke.

<sup>19</sup> Mwanamwan'owo khutthika-tho. Owo khwira, "Ahe, vano ori vayi otaphuleliwa wa yooloh'aka?"

<sup>20</sup> Miyo khwira, "Murwe va, oophentiwa, mukilaathi." Miyo khwira, "Atithi anyu n'ame anyu apatthani aka oreera murima. Munnona? Nto awo arwiiye okhuma oCanada wu, aamumula muteko, ni anneettaka nno ni miyo. Awo annaamini yeela, etthu emphavel'aka ohimya. Ni nkinamuhimeeryeke etthu yoovonyeya mutthu, volakela, kookhalaru. Miyo ka . . . Kinoona wira kinnisuwela etthu enihimya yooloha. Masi mpakha koone yooloha ene mmansaka, vano nto Awo khukileela etthu enihimya'aya, nkikhanle wooleelani. Moone, vakhala wira kinimuupuwelela etthu paahi, pooti okhala okathi munrow'anyu

okiphavela eriyari ya ekumi ni okhwa, vano nto khamunrowa osuwela nkhamu munnikaamini wala nnari.”

<sup>21</sup> Kooleelani etthu p’itthu mwa Nsina n’Apwiya, vekeekhai ti yeeyo. Ti Yaawo akihimenrye yeeyo. Ni mpakha va, iyaakha iya sothene, mulaponi mothene, ni ovira mulaponi mothene, Eyo khenavonyeke hata emaara emosa. Okhala wira . . . Nto, vano, nyuwo moosuwela wira khivanweryaneya mutthu okhala oohivonya siiso. Entthuneya Eroho ya Muluku wira yiire siiso.

<sup>22</sup> Nto vano kookhalana Mutthaka kiry’aka oowaakhula mwaha wa yoowo. Nto imaara sinci-ene kinnuupuweleliwa, eriyari y’atthu, ahe, khino mutthu paahi ohikilante khuupuwela minuutu mmosa, wira miyo kaari e—e, oh, mutthu ootakhala, wira khayaakisivela atthu, ni wira kweekwe kaamwaanariha. Vano kahi siiso. Kahi siiso. Miyo kinnaaphenta atthu. Masi, moosuwela, ophenta ti woottharuxa.

<sup>23</sup> Vaakhanle wira mwan’inyu mwammiravo aakilante muramphani vate vale, nto nyuwo khwira, “Junior, oophentiwa, miyo nkinthuna wira mukhale vate vo, masi. . .” Ni ikaaro sirumaka vakhiviru va yoowo, vano nyuwo khumuruuha mpaani. Owo khunatthikela-tho okhumela ota. Vano, nyuwo mwaahaana omuttharuxa. Vakhala wira munimphenta, munimwiira. Muhaana omuttharuxa.

<sup>24</sup> Mwaamoonale mutthu attelemaka mmurathini arowaka, vakhwararani, mukalawani yaamukhaani, mwaarow’anyu osuwela wira ekalaw’ele yaamurowa opwina owo aphiyar vakhwararani, nyuwo khwira, “John, nyuwo, khino muhaana wuupuwela vakhaani, wira khino khamunivuluwa”? Kasuwelaru wira khonrowa owerya, kinoorowa omukumiha mukalawani, kawerya vale, okhala wira ti ophenta oniira siiso.

<sup>25</sup> Nto vano, Mmitthakani mu miyo kinlavul’aka, nkineereryeke oruaha mwixuttiho, wala ekina. Miyo—miyo kiniira eyo okereja waka. Masi nno eriyari y’alopwana n’athiyana akhanle a miromolelo soovirikana ni ankhili oovirikana, miyo kineererya okuxa enamuna yookasopa, oleeliherya; masi voophiyerya wira mwaayariwe-ene ni Eroho ya Muluku, kookupali wira munimwiiwa saana etthu enihimy’aka, eriyari y’atthu aKristu, aMetotista, aPatista, maPrespiteriyaano, n’akina-tho.

<sup>26</sup> Vano, ohiy’ula, kintthuna kikhunle Maphattuwelo, kapiitulu 24. Kintthuna kisome e . . . opacerya eversiikulu 12 ya kapiitulu 24 ya Maphattuwelo.

*Vano owo aahiira, O Pwiya Muluku. . . pwiya  
Abrahamu, kinnoovekelani, mukiphwanyihe  
onimphavel’aka olelo, mooniherye omureerela wanyu  
murima pwiya Abrahamu.*

*Moone, keemenle va vakhiviru v'ehimeni ya maasi; nto aciruusi aana a atthu a mmuttettheni anrwaas'aya orika maasi:*

*Vano yiiraneye, mwaaruusi onrow'aka omuhimeerya wira, Koovara metto, mutheteye muno anyu, wira kiwurye; owo ahimya wira, Nwuryeke, kinoowuriha ikhamelo sanyu nave: yoowo akhale mwaaruusi omuthanlenj'anyu murumeyi anyu Isakhi; ti siiso sinrow'aka osuwela wira muhooniherya okireerela murima wa . . . pwi'yaka.*

27 Vano nto muLiivuruni mwa Wiisuupulula. Eyo ti yoopacerya ya mBibiliani, Maphattuwelo. Vano, mwa yookiserya ya mBibiliani, kintthuna kisome kapiitulu 21 ya Wiisuupulula, eversiikulu 9.

28 Hiyo noosuwela wira Yolempwa ela ya Maphattuwelo va . . . Musome ekapiitulu yothene, mwatthuna vale. Ti Muluku onimuruma Eliyeseri. Ahiiso, Abrahamu onimuruma Eliyeseri, mukilevelele, wira amuthanle mulipa-oowaakameliwa a Isakhi. Vano Repeka ooreera aahikhumela, ni waakhuliwa wooreera wa mavekelo e—Eliyeseri iiraly'awe, murumeyi a Abrahamu, aamanly'awe ovekela.

Vano eversiikulu 9 ya kapiitulu 21 ya Wiisuupulula.

*Vano naahirwa nlaikha nimosa w'ale mathanu na maili yaarina mihasa mithanu na maili sisareiyeeene ihukhumu thanu na piili sookiserya, khulavula ni miyo, niiraka, Murwe, kiwooniheryeni muthiyana oowaakameliwa, mwar'awe Mwaapwittipwitthi.*

29 Vano kintthuna kikuxe wira okhale mwaha, ohiy'ula, wa yeeyo: *Omuthanla Mulipa-oowaakameliwa*. Nto ela ti, munn'aka onikaravari va atthuna vale, ela ti efiita mukhanly'anyu okawaka.

30 Nto vano, mwa yeela, khenihimya wira vekeekhai kinlavulela muthukuman'ola ori vaava, masi ifiita iya sinrowa mulaponi mothene. Iyo siinnitaphuleliwa mwa, voowiiraka, oh, mpante muulupale wa mattaava, hata mittetthe s'apakawu mulaponi mothene. Hiyo ninooveleeliha ifiita iyo, mahala, mwa enamuna emosa ya muxovo wa ekereja. Ni sinnitaphuleliwa. Ni okhuma epante emosa mpakha ekina sa itakhwa sa wAfrika, ni oHintiya, ni mulaponi mothene, sinnirowa ifiita iya.

Vano, omuthanla Mulipa-oowaakameliwa!

31 Mwa itthu sinci-ene sa ekumi hiyo ninnivahiwa muthanlelo. Enamuna y'ekumi, eneene, onkhala othanla. Nookhalana ehaakhi y'okhaliha enamun'ahu, othanla enamun'ahu sinthun'ahu okhala.

32 Osoma othanlaa. Hiyo ninniweya othanla nkhamaninrowa osoma, wala khaninrowa osoma. Eyo ethanlelo hiyo erin'ahu.

33 Yooreera ni yootakhala onkhala othanla. Khula mulopwana, khula muthiyana, mmiravo ni mwaaruusi, ohaana othanla vakhala wira anrowa ophavela okhala vooloka ahiiso ohikhala vooloka. Onkhala othanlaa.

Othanla etthu yuulupale.

34 Makiseryo anyu Oohimala othanlaa. Ni khino, ohiy'ula, amosa-amosa a nyuwo munimwiira yeeyo—ethanlelo yeeyo, ya nipuro onrow'anyu oviriha Yoohimala anyu, mutek'ola ohinatthi omala ohiy'ula. Onoophiya okathi, wira, vakhala wira moomukhootta Muluku imaara sinci-ene, onoophiya okathi onrow'anyu omukhootta emaara yookiserya. Wookhala mukaano eriyari ya omoreliwa ikharari ni olamuliwa. Ni etthu yoowoopiha wa mulopwana wala muthiyana, mmiravo wala mwaaruusi, otupha mukaano yoowo, okhala wira khivantthikiwa mutthu atupharu mukaano yoowo wa okhwa. Tivo, ohiy'ula, pooti okhala okathi anci-ene anrow'aya wira yawaya—ethanlelo aya, nipuro anrow'aya oviriha Ehimalelo aya voohimala.

35 Yookhala ethanlelo ekina nrin'ahu mwa makhalelo, eyo ti, mwaara a ekumi ahu yothene. Mmiravo wala mwaaruusi, onthuna wira soothanla mwa ekumi, onni—onnivahiwa ehaakhi y'othanla. Mwammiravo mulopwana onoothanla. Mwaaruusi ookhalana ehaakhi y'okupali wala okhootta. Masi nlelo onkhala othanla, ipantte soopiili. Oowaili mulopwana ni muthiyana, aakhalanasa ehaakhi y'othanla.

Nave-tho, nyuwo mookhalana othanla, ntoko muKristu.

36 Nyuwo mookhalana othanla wa ekereja, wAmerika nno, mpakha va, weiwo mukhanly'anyu weettaka-wo. Iwo p'ureeriwa wanyu wa mutthu a wAmerika, othanla khula ekereja muntthun'anyu wira mpantta. Iwo othanlaa. Khamurina orowa hata emosa, mwaahitthune vale orowa. Masi mwatthuna waakakhanya okhuma Metotista murowaka Patista, wala Katolika murowaka Prustante, wala siiso, khaavo okhanle wooleelani wala owiirihani orowa ekereja emosa. Iwo p'u—iwo p'utaphuwa wahu. Ti yeeyo okhanle otaphuwa wahu w'atthu. Khula mutthu onoowerya othanla mmansawe. Otaphuwa wa etiini, ni eyo e—etthu yuulupale. Muluku anikhaliherye osuka ntoko sinwery'ahu.

37 Nave-tho nyuwo mookhalana ethanlelo. Vakhala wira... Mwaathanlaka ekereja yeela, munoowerya othanla vakhala wira nyuwo, ekereja yeela, nkhamu munrowa othanla ekereja enrowa oweetiheryani mpakha makiseryo anyu Oohimala. Munoowerya othanla ekereja erina eyaaminelo khata, tivo nyuwo pooti wuupuwela wira eyaaminelo ti etthu muntthun'anyu paahi. Wala, ekereja ekina yookhalana eyaaminelo aya.

38 Vano nto aakhala Masu a Muluku, wa yaawo murin'anyu othanla. Muhaana othanla.

Nookhala nlamulo noohilempwa eriyari ahu, na othanla.

<sup>39</sup> Kookupali wira aari Eliya, emaara emosa, vasulu va Mwaako Karmelo, nuumala okathi wo weereriwa, okathi muulupale wa ethowelo nihanly'ahu ophiyerya naanaano va. Nto khino, siiso okhanle-ene wa nyuwo wala miyo, ohiy'ula, wira niire ethanlelo yeela, ntoko musuwelelo wa Omwaako Karmelo. Voohithepya, kinoona wira enimwiiraneya, mulaponi mothene, naanaano va. Masi naanaanoru onookhala okathi murin'anyu othanla.

<sup>40</sup> Ni nyuwo alopwana va, a ikereja sanyu sa muromolelo, mwaamini ila paahi, wira okathi ene ohookhuveelani, onrow'anyu wira ethanlelo. Munoorowa okela muKonsiiliyu ya Mulaponi mothene, ahiiso khamunrowa-tho okhala muromolelo. Muhaana orowa wira yeeyo, nto othanla iwo onimoorwa voohipisa.

<sup>41</sup> Ni etthu yoowoopiha olipelela mpakha okathi yoowo wookiserya, nave, okhala wira vaamuweryaneya okuxa etthu mwaaharow'anyu okhalakhala nweryaka wiihuluxa. Moosuwela, wookhala okathi mukhanly'anyu olopoliwaka, nto, mwatupharu mukaano yoowo wa olopoliwa, vano munoorowa otthittiwa epante ekina, otthittiwa.

<sup>42</sup> Muupuwele, okathi waaphiy'aya eyaakha ya eyopeeli, nto na—namukuttho onakhuma arumihaka nlope nawe, wira khula epottha yaahaana orowa vootaphuwa. Masi awo yakhoottaru otaphuwa waya, nto aahaana okuxiwa khuroihiwa mpaani m'okokhorela, vanripuni, nto muttemulelo waanimuttemula naaru, vano nto owo aanimurumeela pwiy'awe mahiku othene. Waaheliwa vanaaruni vawe ntoko mooniheryo, wo wiiwa. "Waamini onrwa mwaha wo wiiwa." Owo ohiiwa nlope nle, masi khotthunne wiiwelela.

<sup>43</sup> Ni imaara sinci-ene, alopwana n'athiyana anniiwa Ekeekhai ya Muluku, ni woona Eyo olipiheriwa ni wooniheriwa, Ekeekhai, masi nnakhala vo awo khandthuna wiiwelela Yeeyo. Nookhala niwoko nikina. Yookhala ethanlelo ekina awo arin'aya, ohiya okumanana voominyala Ekeekhai ni sookhumelela, tivo maaru aya pooti otthukeya wa Ehapari yooreera. Awo khandrowa-tho wiiwa Eyo. Woolopolani waka, Muluku alavula-ru ni murim'anyu, mwiire naanaanoru.

<sup>44</sup> Eliya aahaavaha ethanlelo, yaatthuneya wira yiire: "Mmuthanle olelo t'ani onrow'anyu omurumeela. Muluku akhala Muluku, mmurumeele Yoowo. Masi Payaali akhala Muluku, mmurumeele yoowo."

<sup>45</sup> Vano, ntoko sinoon'ahu wira itthu sothene sa ephattu ti ethooneryo sa itthu sa erooho, ntoko nisomaly'ahu nisomi nahu voosiis'ula, ntoko nsuwa ni mukhalelo aya. Owo t'ari Bibilia aka oopacerya. Kihinatthi hata osoma nikukhu nimosa mBibiliani, kaanimusuwela Muluku. Okhala wira, Bibilia t'olempwa mapuro othene mwa soopattuxiwa, ni onimwiiwanana ni

Masu a Muluku: moota okhwa, ovithiwa, ohihimuwa wa soopattuxiwa; ni nsuwa nimphattuwa, ninnivira, otupweela, okhwa, ophattuwa-tho. Sookhala itthu sinci-ene naarow'ahu oweriya olikanyiha, Muluku mwa soopattuxiwa, nrin'ahu ohiya, sa Mutthak'ola.

<sup>46</sup> Vano, vakhala wira sa erooho, ahiiso, s'ephattu sinooniherya sa erooho, weso, omuthanla mulipa-oowaakameliwa, mwa ephattu, ti eyooniheryo y'omuthanla Mulipa-oowaakamweliwa, Mulipa-oowaakameliwa, mwa erooho.

<sup>47</sup> Vano, ela etthu yuulupalexa naarowaka omuthanla mwaara, mulopwana, okhala wira natiri va ti "mpakha okhwa onivalaanye." Ti siiso vaatthuneya wira nisukeke yeeyo. Nto nyuwo munimwiira natiri uwo, ohoolo wa Muluku, wira okhwa paahi t'unrowa woovalaaniani. Ni kinoona wira hiyo naahaana...Mulopwana ori ni muupuwelo awe wooloka, onitthokiha makhalelo awe oohoolo, wira aahaana omuthanla mwaar'owo vookasopa saana. Mukhale ookasopa etthu muniir'anyu. Ni muthiyana onimuthanla iya, wala okupali othanla wa iya, aahaana okhala ookasopa saana etthu eniir' awe, ni vanci-enexa mahiku ala. Mulopwana aahaana otthokelela ni olompa ahinatthi omuthanla mwaara.

<sup>48</sup> Kinoona wira, olelo, sinikhal'aya myaha sinci-ene s'omwalana vano, wira hiyo ninniholeela olumwenku wAmerika, mwa myiha s'omwalana. Hiyo ninniholeela olumwenku. Wookhala omwalana wunci-ene ovikana nipuro ti nipuro nikina, elapo ela, ni enuupuweleliwa okhala, ni ottittmihiwa ntoko, elapo y'eKristu. Opahuwa xeeni, ipwaro sahu sa milattu sa omwalana! Kinoona wira, mwaha aya, okhala wira alopwana aroomurakamela Muluku, ni athiyana aroomurakamela Muluku.

<sup>49</sup> Ni hiyo ninnoona, wira, vaakhanle wira mulopwana aamulompa ni muthiyana aamulompela mwaha ene yoowo; kahi oweha paahi maitho maili ooreera, wala makhata maalupale a ikuru, wala etthu siiso, wala osiveliwa okina wa molumwenkuni; masi aamuweha toko Muluku, ni wira, "Muluku, nno p'utthuna Wanyu?"

<sup>50</sup> Kinoona wira, olelo, khoreere okhala ohiromomeleya wunci-ene, siiso ntoko oxikola. Okathi—okathi anamwane anvir'aya, voosiisu, anamwane anci-ene w'anamwaattamanani, wira—wira apatthani aka, anoovira ni wira, "Munna Branham, munnitthuna onivekelele? Ninrowa wira e—eporova olelo. Miyo—miyo koovara muteko ohiyu wothene, nto nkinoona wira kinoowerya—kinoowerya waakhula. Mukivekelele." Kinoona wira khula naxikola, vaakhanle wira nyuwo, vaakhanle... Ni axitiithi vameesa voosiisu, mwaamuwerya wira, "Maama, John ookhalana eporova olelo. Nrowe nimuvekelele vano." Kinoona wira eyo yaamuvikana sothene sikhane wiiriwaka



mwa enamuna ekina, wala oweha vasulu v'epaphelo ya mutthu mukina ni woothererya, kinoona wira, vaakhanle wira mwaamukhuma khuvekelela mwaha ene owo.

<sup>51</sup> Ni vaakhanle wira naamutthokelela etthu eniir'ahu naarowaka othela, naamuthanlaka mwaar'ihu, iy'ahu, vaakhanle wira naamutthokelela saana yeeyo! Mulopwana aahaana ovekela voohirukuneya, maana vaamuweryaneya ohonona makhalelo awe othene. Muupuwele, natiri ti "mpakha okhwa onivalaanya," ni vaamuweryaneya owo ohonona makhalelo awe mwaha w'othanla voohiloka. Masi owo aasuwelaka wira, athanlaru voohiloka ni omuthela muthiyana oohiphwanelela okhala mwar'awe, nave owo khunaira khula enamuna, vano owo mwah'awe. Muthiyana amukuxa iya onsuwel'awe wira khamphwanela okhala iy'awe, vano mwah'awe, vammal'anyu osuwela yooreera ni yootakhala. Tivo, khivaatthuneya nyuwo wira mpakha ovekela vamphiery'aya.

<sup>52</sup> Vamosaru ennilikanyihya ni othanla ekereja. Vano, muhaana ovekelela ekereja munipatthan'anyu-wo. Muupuwele, ikereja sookhalana erooho.

<sup>53</sup> Vano, nkinthuna okhala oowuulumela. Masi kinnisuwela wira ka mutthu mutokweene, ni kihaana okhuma va, nihiku nlo. Ni kihaana waakhula Nihiku na Olamuliwa mwaha w'etthu enihimy'aka ohiy'ula wala okathi p'ukathi mukina. Ni miyo, tivo, kihaana okhala oothokorerya voomalela ni ookupali vekeekhai.

<sup>54</sup> Masi, murowe mukereja, nto mwaweharu saana mwiirelo wa ekerej'eyo, mmuwehe paahi pastore vakhaani, voolimaleleya munimoona wira ekereja eniira ntoko pastore. Imaara sikina, kinniikohaka vakhala wira khaninkuxa irooho sa mutthu ni mukhw'awe ohiya Eroho Yowarya. Mphiye nipuro pastore okhanly'awe oolipiheryexa ni oniir'awe itthu siiso, munimoona wira muthukumano ti siiso. Kooroihani okereja weiwo onimoon'aka pastore ovenya, ottikinya muru awe nno ni nno. Nwehe muthukumano, awo aniira etthu emosaru. Mmuwehe pastore, onimiry'a etthu p'itthu, voolimaleleya ekereja enimwiira etthu emosaru. Tivo, vaakhanle wira kinthanla ekereja, kaarowa othanla, ekereja yooreera, ya mulipiheryo, ya Ehapari yooreera Yoomalela, ya Bibilia, vaakhanle wira kinthanla emosa yo waahela-mo amusi aka. Othanla. Miyo kaahiweha . . .

<sup>55</sup> Amiravo, nihiku nimosa, mwaana mulopwana a Munna Shakarian ni mutthep'awe, yaahikikuxa nno wira kamuvekelele mmiravo mmosa, mulipa-oowiipa, mmiravo oolakeya. Aammalaru otthika . . . Fred Barker, nlo naari nsina nawe, ammalaru otthika mukwaha mmosa. Vano awo khukiihanasa, wira, "Fred aamookhwa." Vano nto, 'kihinatthi ophiya emp'eyo, muhupi mukina waahirwa, "Siiso okhwiyeene naanaano va." Nto khuhimmwa wira owo aarina o-oyeeheya ephome

mottooporeni, ni aahimuuma nantirya, ni—ni amookhwa, nto amwaar'awe yaatthuna wira kimuvekelele.

<sup>56</sup> Nto miyo khuupuwela, “Oh, kaphavelaru orowa ni ntteeke, owo aamookhwa 'kihinatthi ophiya-wo, ni pooti okhwa naanaano.” Tivo, miyo khulikari naanaanoru ni khumuruma mwaamuthiyan'owo orwa vatelefoonini. Nto—nto khumuttopayerya telefooni, ni owaruni wa Fred. Owo khaawerya ottikiha iphumu. Aattikiherihiwa iphumu mwa enamuna yoopakiwa. Nto okathi omuvekelenly'ahu, owo khwira, khukwata, wira ekumihiwe vammilo vawe. Owo aaniwerya ottikiha iphumu. Mameetiku khayaamini. Awo khukumiha-vo, nto owo aaniwerya ottikiha iphumu. Owo aarookilaathi, nihiku nlo.

Ekereja; othanla ekereja.

<sup>57</sup> Kinoomalaru omwaakhela oraami, okathi vakhaani ovinre. Voosiis'ula, mutthu a mukereja mwaka, ori vekeekhai muPatista a oLouisville, owo okhwiye oxaka voosiisu yoola. Nto ekerej'aka owaani, nikhuru nimosa n'atthu oowiivahererya vekeekhai wa Muluku, khuthukumana vamosa khurowa weiwo, alipa a miteko s'ovitha ahinatthi ottikitthela murette erutthu awe, khumweemelela, khuvekela mpakha ekumi omutthikela. Vano owo mukumii, ohiy'ula. Ahumu a okereja waka, vano, awo yaahixuttihiwa wira yaamini wira sothene sinniweryaneya, khurwa wa Muluku vaxariya-vo.

Tivo, muhaana othanla vooloka.

<sup>58</sup> Emaara ekina, muthinto wa muthiyana mulopwana onimuthanl'awe, onooniherya ithama sawe ni mukhalelo awe. Mulopwana amuthanla muthiyana oohikhala, onooniherya mukhalelo wa murim'awe. Ni etthu oniiphitaanian'awe, ennooniherya vekeekhai ele eri mwa yoowo. Muthiyana onooniherya ele eri mwa mulopwana owo aamuthanlaka wira akhale mwaar'awe. Enooniherya ele eri muhina mw'awe. Voohicala ele enihimy'awe ota, mmuwehe mutthu omuthenly'awe.

<sup>59</sup> Miyo kinoorowa oskritooryu wa mulopwana, ni owo onihimya wira muKristu; ilatarato s'athiyana vaxirini vothene, arumihaka isipo iye boogie-woogie. Nkincala etthu enihimy'awe. Nkineaamini onamoon'awe, okhala wira erooho awe enlya itthu iye sa molumwenkuni. Ni, nrowe niire, ankhii owo amuthela mwali a munikhuruni no wiina, wala amuthela pwiyamwene a ekhapa, wala riketa ooreera paahi, a vano? Eyo ennooniherya. Enooniherya etthu orin'awe mmuupuweloni mwawe, ya etthu etthoko awe y'ohoolo enrow'aya okhala, okhala wira owo omuthanlale wira aalele an'awe. Nto onakhalaru etthu p'itthu, eyo t'inamuna onrow'awe waalela aana awo. Tivo, eyo ennooniherya ele eri mwa mulopwana. Mulopwana onimukuxa

muthiyana ntoko owo, enooniherya paahi ele enuupuwel'awe y'ohoolo.

<sup>60</sup> Mwaamuwerya omuthhokelela muKristu airaka etthu siiso? Nnari, mulopwana. Miyo nkaawerya. muKristu eekeekhai khonrowa waaweha mapwiyamwene awo ooreera, ni axiruusi a munikuruni w'alipa aniina, ni mapwiyamwene a ekhapa. Owo onrowa ophavela mukhalelo w'eKristu.

<sup>61</sup> Vano, khivanweryaneya okhalana itthu sothene. Pooti okhala mwaaruusi ooreera saana. Nto mwaaruusi mukina, khino owo t'o. . . mukhalelo awe onikhala ntoko wooreera omuvikana ola. Ni nyuwo khino pooti okhala oomuhiya mmosa mwaha wa mukina, masi, owo aahikhale a mukhalelo wa muhano, wa muthiyana. Ni, owo. . . Nkincala sinto owo t'oreera wala nnari. Vanreerela nwehe mukhalelo wa murim'awe, hata akhalaka ooreera wala oohireera.

<sup>62</sup> Vano, maana, ti voophaveleya, muKristu aamuthanlaka mwaara, owo aahaana omuthanla muthiyana, ooloka ooyariwa vasya, voohicala etthu enlattanana'awe. Ti yeeyo ekhenly'awe, enimukhaliha. Vano nto, emaara ekina, eyo ennooniherya mukhalelo wa murima wa mulopwan'owo voottittimiha, ni ennooniherya etthu eri mmuupuweloni mwawe ni etthu onrow'awe okhala ohoolo, maana emusi awe enrowa okhapeleliwa ni muthiyana yoowo, wa ithokiheryo s'ohoolo sa ethhoko awe.

<sup>63</sup> Owo amuthelaru mmosa wa mariketa ala a vano, mapwiyamwene a ekhapa, aarowa owehererya exeeni? Muthinto xeeni w'ethhoko mulopwana aarow'awe owehererya okhalana? Owo amuthela mwali ohirina olakeya woophiyerya mwa yoowo wira akhaleke owaani ni akhapeleke ethhoko, ni onthuna ovara muteko ota muskritooryu mwa mutthu mukina, enamuna xeeni ya mwaneene ethhoko owo onrow'awe okhala? Munookhalana anlela mwaana ni itthu sothene. Eyo ekeekhai.

<sup>64</sup> Vano, miyo nkikhanle mwa osiveliwa nno w'atthu wa vano, wa athiyana ovara muteko. Kaawoonaka axithiyana ala ewanreene ikuwo iya sa muteko, yeettasaka nno ni nno mpooma mu, mmiyootani, ntoko mupiliisa, iwo otakhaliwa wa khula muttetthe onrowa omuhiya muthiyana wira yeeyo. Munnona? Munnona? Aryeene alopwana anci-ene ahirina muteko, eyo ennooniherya muupuwelo wa vano wa muttetthe ahu. Eyo ennooniherya ohononeya. Khanirina okhalana athiyan'awo ota iwo siiso. Awo kharina okhala ota iwo siiso.

<sup>65</sup> Okathi Muluku omuvahaly'awe mulopwana muthiyana, Owo aamuvahale etthu yootepa oreera Owo aakhanly'awe omuvahaka, voohiya woopowa. Masi mmosa aathunaka okuxa opuro wa mulopwana, nto owo etthu yootepexa owo aakhanly'awe okhalanaka. Vano, eyo ekeekhai. Munnona?

Vano ninoowerya woona muhelelo wa erooho.

66 Miyo—miyo koosuwela wira ti yoonanara, nyuwo munuupuwela wira ti yoonanara, masi ti Ekeekhai. Hiyo khanincala moota xeeni ekhanly'aya yoonanara, nihaana owehexaxa mwah'owo. Ti yeeyo Bibilia eniixuttih'awe. Munnona?

67 Vano, hiyo ninnoona va voowooneya etthokiheryo ya muroohoni, ya Muluku atthokihaka Etthoko Awe y'ohoolo ni Mwaakameliwa Awe a ohoolo, ennoneya oratteene vano.

68 Mulopwana amuthela pwiyamwene a ekhapa, munnoona etthu onweherery'awe y'ohoolo. Mulopwana amuthela muthiyana ohinrowa okhala owaani, munnoona etthu onweherery'awe ohoolo. Nto miyo emaara emosa . . .

69 Ela eniiweya yoonanara saana. Miyo kinnoona wira kihaana ohimya tu. Ni miyo—miyo, voolimaleleya, koonaka wira kihimye etthu, kihaana ohimya. Ni voolimaleleya ti enamuna ya Muluku.

70 Miyo—miyo kaanirowaka othuma imompe ni namasuka mmosa kaavaran'aka-no muteko, othuma imompe. Nto kaanimuwaha mutokweene owo okathi wothene awehaka wiitho wa muhore ahinatthi orowa ohimya esisapo. Vano owo aanirukunxa muru aya, ni aaniweha nno ni nno. Miyo kaanimutthariha, kaanimuwaha. Vano owo aaniweha osulu ni vathi, vakhala wira waari oratteene, munuwelo. Vano aanirukunuwa khuweha wiitho waya, nto imaara sikina aanittikinya muru aya khurowa.

Miyo khwira, "Jeff, kintthuna kookoheni etthu."

Owo khwira, "Muhimye, Bill."

71 Nto miyo khwira, "Xeeni nyuwo kweekwe owehaka emompe eyo wiitho?" Miyo khwira, "Ennooneya okhala saana, emo—emompe yoothiyana yooreera yoolemela."

72 Khwira, "Kintthuna kooleleni, mmiravo, sookhala sinciene wira mwiixutte." Nto miyo—miyo khusuwela vamanly'awe okileela. Khwira, "Miyo nkincala moota sipakiw'awe. Owo pooti okhala enama, mpakha mmettoni. Masi akhalanaru nweheryo ole wa mutakhwani wiitho, muhimuthume."

Khwira, "Mwaha wa xeeni, Jeff?"

73 "Ahe," khwira, "etthu yoopacerya t'ila," khwira, "owo khankhalakhala akhalaka oomaala." Nto owo khwira, "Etthu ekina t'ila, owo khunrowa okhala maama a mwaanyompe awe." Ni khwira, "Owo onipwehiwa munikhomani vano, tivo onenevaly'awe. Mwataphula-ru, ni oweha iwe wa mutakhwani, onimwiisiiva mwaha w'otthyawa."

74 Miyo khwira, "Moosuwela, kihixutta etthu mwa enamuna emosa. Kookupali wira eyo ennilataniheya n'athiyana, nave." Khweeli. Khweeli.

<sup>75</sup> Owehexaxa iwe, wa mutakhwani, wa riketa, vanreerela omurakamela, mmiravo, etthu ile yothehe yooripelela vasulu va maithoni vawe vale. Ni miyo nka. . . Miyo nkaarowa otthuna eyo. Nkinoona wira ti yoomuphwanela muKristu. Nkincala moota televisawu ni ixornaale sinihimy'aya wira ti yooreera. Ekhalelo yowooneya otepa onanara, yoowoopiha kitonko aka woona kookhalaru.

<sup>76</sup> Okathi woonaly'aka eyo emaara yoopacerya, nno oRestaurante Clifton, voosiisu uwo, wolyani wa voosiisu. . . Kaaroowoona aximwali kamosa-kamosa jaarwaanse. Munna Arganbright aammalaru okela, ni miyo. Ni owo aahikhuruwela vathi va ixikatta. Nto miyo khuweha, vano mwali ule khuvolowa. Miyo khuupuwela, "Ahe, miyo—miyo—miyo—miyo nkinsuwela." Nkinatoko woona yeeyo kookhalaru. Yaari muthinto mmosa. Oh, aakhala ntoko aarina makhwatta a murupela, moosuwela, ekhalelo emosa yootikiniha vakhaani. Miyo nkinihimya eyo wira etheihe. Miyo ki—miyo kinoohimya. Moosuwela, miyo kinnoonaka maretta. Miyo ka misionariyu. Miyo kinnoonaka inamuna sothene sa itthu sootikiniha, moosuwela, sa moota iretta. Nto miyo kaamurowa mpakha wa mwamuthiyan'owo kamuleele, "Miyo—miyo—miyo ka murumeyi. Miyo—miyo kinnaavekelela aretta. Munni—munnitthuna wira kooevekeleleni?" Ni kiira kihinatoko woona etthu siisaale. Vano nto, va khurwa-tho akina aili wala araru, khuvolowa. Miyo khutthikela ottuli khulipelela.

<sup>77</sup> Nto Munna Arganbright khurwa, vano miyo khwira, "Munna Arganbright?" Khino owo ori vaava. Miyo khwira, "Exeeni enimwiira muthiyan'ole?" Munnona?

Nto owo khwira, "Iwe, iwe wiipintari."

<sup>78</sup> Miyo khwira, "Ahe, wulu, wulu!" Munnona? Koona wira aahaana oroihiwa muxipiritaali y'atthu oovalaanyiwa nipuro nlo, moosuwela, wira ahiravihiwe athiyana othene.

<sup>79</sup> Masi, moosuwela, muhaana wuupuwela, oweha, ovekela, mwaarowaka othanla. Maana, hiyo ninnoona, mwa yeela, Masu a natiri. Owo, mulipa-oowaakameliwa mulopwana onrow'awe omuthanla, onrowa wooniherya mukhalelo wa murim'awe. Ennooniherya ele eri mwa mulopwan'owo.

<sup>80</sup> Vano, mwaamuwerya omuthokelela mulopwana, oosareya Eroho Yowarya, okuxa etthu ntoko eyo wira akhale mwaara? [Muthukumano oniira, "Nnari."—Mol.] Miyo—miyo—miyo nkinoona, munna. Vano, khino miyo ka mutthu oowuuluvala a omeekha. Masi, moosuwela, miyo—miyo nkinwerya osuwela saana yeeyo, moone, nwehe, okhala wira enrowa wooniherya ele eri mwa yoowo. Owo onrowa omukhaliherya okhaliha ethhoko awe y'ohoolo.

<sup>81</sup> Vano, nto, naahokolowelaka vano okathi vakhaani, epantte ya erooho. Nto moonakaru ekereja eri molumwenkuni,

eniira ntoko olumwenku, ni nrromelo wa molumwenkuni, yaataanaka n'ulumwenku, ekhalihaka Sooruma sa Muluku ntoko wira Owo khonalepeke Seiyo, vano nyuwo—nyuwo munoowerya otthokelela paahi wira Kristu khonrowa omukuxa Mwaakameliwa ntoko yoowo. Mwaamuwerya otthokelela akuxaka ekereja ya vano olelo ntoko Mwaakameliwa? Kahi Pwi'y'aka. Miyo nki...Miyo vaamukirikela osuwela saana yeeyo. Nnari. Muupuwele, vano, mulopwana ni mwaar'awe ari mmosaru. Mwaamwiitakanxa ni mutthu ntoko yoowo? Mwaira vale, vekeekhai eyo yaamuvirikanya owaaminini waka.

<sup>82</sup> Vano, nto, ankhi Muluku wiitakanxa Mmansawe ni etthu ntoko yeeyo, namuttompe oowuulaaniwa a muromolelo? Munooni wira Owo aamwiira yeeyo, “Wooneyaka ntoko atthu oothunku masi ekhoottaka owerya waya”? Owo khaakhanle wiiraka yeeyo. Eyo ehaana okhalana mukhalelo Awe mwa yeeyo. Ekereja, y'ekeekahi, yooyariwa vasya ehaana okhalana mu—mukhalelo waari mwa Kristu, okhala wira iya ni mwaara ankhala mmosaru. Nto vakhala wira Yesu iiraka paahi ele yaamusivela Muluku, aanisuka Masu Awe ni wooniherya Masu Awe, Mwaakameliwa Awe ohaana okhala a enamuna emosaru ya mukhalelo. Owo khaakhanle, hata vakhaani, okhalaka muromolelo. Okhala wira, nto, hata wira muntthuna ohimya sayi wira, “nnari,” owo oneettiheriwa ni nikhuru nimosa nipuro nlo, ninimuhimeerya etthu yo wira ni etthu ehikhanly'aya wira, ni, imaara sinci-ene, ikilomo imilyawu ota wa Masu eekeekhai.

<sup>83</sup> Ti yoowooniha othunku hiyo ophiyererya omuhiya Muhooleli Muluku onihienry'awe wira ahooleleke Ekereja. Owo khonaarumeke ahumu a estaatu. Owo khonaarumeke mapixipu, makarteyaale, anamukuttho, mapaapa. Owo ovelelihenrye Eroho Yowarya Ekereja, wira ehooleleke Ekereja. “Okathi Eyo Eroho Yowarya enrwa'aya, Eyo enooweettiheryani mw'Ekeekhai yothene, enoowupululelani itthu iya, koohimenry'akani, enoowuupuwelihani, ni enoowooniheryani itthu sinrowa orwa.” Eroho Yowarya yaari wira yiireke yeeyo. Vano, ekereja ya vano enninyokha Yeeyo. Awo khenaasivela Eyo, vano vanweryaneyaya sayi okhala Mwaakameliwa a Kristu? Atthu oolelo anthanla muromolelo wa vano. Eniiraneyaya ti, eyo enooniherya paahi ohiiwa waya saana Masu.

<sup>84</sup> Miyo nkinthuna wira koonanariheni, masi kintthuna wira ekele muhina saana wira nwehe yeeyo.

<sup>85</sup> Miyo khaatheliha anaithoko anci-ene, masi kweekwe enikuupuxerya Kristu ni Mwaakameliwa Awe. Nimosa wa maira oothelana kipakaly'aka nno, woohikhala khalayi, ya—yaari etthu yoosuweleya mwa makhalelo aka. Soovira iyaakha sinci-ene, okathi waary'aka murumeyi mmiravo paahi.

<sup>86</sup> Muhim'aka aavara muteko o—o PWA. Nkisuwenle nkhamaa ookhala mutthu onuupuwela yeeyo, nlelo, wala nnari, mutthu okhanle oowunnuwa ntoko miyo. Nto owo waari mu—muteko kuveerunu aatthokihaly'awe. Nto muhim'aka aavaraka muteko, ikilomo soophiyaka miloko mixexe ni thanu na tthaaru. Awo yaathipasa matthiya kamosa-kamosa, muteko wa esukelo.

<sup>87</sup> Nto aahikhala mmiravo mmosa aavara muteko weiwo, ni yoowo, a oIndianapolis, woophiyaka, oh, woophiyaka ikilomo emiya ni miloko mithanu na mosa osulu w'oJeffersonville weiwo ki—kinkhal'aka, ahiiso kaakhal'aka. Ni aahikhala mu... Owo khumuhimeerya muhim'aka, nihiku nimosa, owo khwira, "Doc," owo khwira, "Miyo—miyo kintthuna... Kinrowa othela, vaakhanle wira kookhalana musurukhu oniphiiyerya omuliva mulaleyi." Owo khwira, "Miyo—miyo kirina musurukhu oniphiiyerya elisensa aka, masi," khwira, "Nkinrina musurukhu oniphiiyerya omuliva mulaleyi."

<sup>88</sup> Doc khwira, "Ahe, muulupale aka mulaleyii, ni—ni owo—owo onoowerya woothelihani." Owo khwira, "Owo khonaliviheke itthu ntoko iyo."

Owo khwira, "Mwaamuwerya omukoha sinto onookitheliha?"

<sup>89</sup> Ahe, ohiy'ule muhim'aka khukikoha. Miyo khwira, "Vakhala wira owo khonatoko othela khalayi, hata mmosa w'awo, ni awo a... sothene sakhalaru oratteene."

Owo khwira, "Ahe, ayo, kinoomukoha."

Nto miyo khwira, "Vakhala siiso, mmuleele, arwe."

<sup>90</sup> Vano, vaphiyaly'aya Saapatu mmirav'owo khurwa. Eyo ennikhalka etthu yuulupale wa miyo, kweekwe otthikela wuupuwela yeela. Miyo... Makaaripi w'epula, ni ekaaro emosa Chevrolet ya khalayi, ni maluuxu oothukiwa ni araame, aapwehale, owiitho w'empa. Okathi vakhaani vaamanly'aya okipweteya amwaar'aka, nto miyo kaakhala meekh'aka, ikatthi piili sikhaani. Ni—ni Doc aari vaavale ni miyo naalipelelasaka.

<sup>91</sup> Nto—nto mmiravo mmosa khukhuma mukaaroni, ni vekeekhai owo khaakhala ntoko mutheli, wa miyo, wala khaakhala wa mutthu ti mutthu, woona waka. Ayo. Miyo kaaniwerya othuma ephaara yooreera ya ixapattho, ni etoolare emosa ni isentavo miloko mithanu. Vano owo aawanre ephaara emosa, saari soolala. Ni ikalsa sawe saari sootaphuwa. Ni owo aawanre ikhasako iya sa khalayi sa kamursa. Nkinkupali wira amosa-amosa a nyuwo atokweene mwaamuupuwela. Saakhala ntoko saakatthiwe mmaakinani khuhituuxiwa, ni yaari yoonyokotowasa, yoothukiwa so, ni niveru nivenyaleene.

<sup>92</sup> Ni mu—muhanoo mwaamukhaani khukhuma mpantte mmosa, ni ekhaani, oh, ni emosa wa ivistiitu iye sikhaani xatrexi.

<sup>93</sup> Miyo nkisuwente. Miyo kaahivonya mwaha wo wiihana muthinto owo w'ekuwo, emaara emosa. Gingham, kookupali wira enniihaniwa. Nto siiso eyo yaari e... [Muthukumano onotheya—Mol.] Miyo koohimya-tho voovonyeya. Miyo—miyo kweekwe kinniira yeeyo. Nto miyo khwira . . .

<sup>94</sup> Owo khukhumela ota w'ekaaro, nto awo khuwelasa ivitto. Nto—nto okathi avolowans'aya, mwaamukhaani uwo owooniha othunku, owo . . . Woono waka, owo, yothene aawanry'awe yaari esaaya. Ni khaawanre hata, ixapattho, voowooneya. Owo eettale mukwaha avekelaka opakhiriwa okhuma Indianapolis, ohitto. Aahikhalana maihi ooyeva yaakhuruwela vathi, ottuli, oorakama, ntoko ootthanvwa ottuli wawe. Aakhala ntoko ooyevaxa.

Vano miyo khumwiirela, “Muhinnuwa voophiyerya wira mutheliwe?”

<sup>95</sup> Owo khwira, “Ayo, mulopwana.” Nto owo khwira, “Miyo kihaana epaphelo aka y'otthuniheriwa elempe y'atithi aka n'ame aka.” Owo khwira, “Kaahaana wooniha o—opwaro wa milattu nno, wira kiphwanye elisensa aka.”

<sup>96</sup> Miyo khwira, “Vaareera.” Miyo khwira, “Kaatthuna kilavule ni nyuwo vakhaani nihinatthi opaka niira nla n'othelana.” Awo khukilaathisa. Mmiravo aakhala awehawehaka musaala; vaanitthuneya owo omettha maihi voowaakuveya. Nto owo aakhala awehawehaka musaala. Owo khaakiwiryana. Miyo khwira, “Mwan'aka, kintthuna wira nwiriyane etthu enihimy'aka.”

Khwira, “Ayo, mulopwana.”

Nto miyo khwira, “Munnimpenta mwali ula?”

Owo khwira, “Ayo, mulopwana. Kinnimpenta.”

Miyo khwira, “Nyuwo munnimpenta mulopwan'owo?”

“Ayo, mulopwana. Kinnimpenta.”

<sup>97</sup> Miyo khwira, “Vano, mookhalana nipuro n'omuroiha-wo mwamuthela vale?”

Khwira, “Ayo, mulopwana.”

<sup>98</sup> Miyo khwira, “Vaareera. Vano,” Miyo khwira, “Kintthuna kookoheni etthu emosa. Ntoko sinsuwel'aka, munvara muteko oPWA nno.”

Nto owo khwira, “Ayo, mulopwana.” Saari itoolare soophiyaka muloko ni piili khula esumana.

Miyo khwira, “Munuupuwela wira munoowerya omulyiha?”

Owo khwira, “Kinimwiira sothene sinwery'aka.”

<sup>99</sup> Nto miyo khwira, “Ahe, eyo ti yooreera.” Nto miyo khwira, “Vano, ankhii owo akhuma... Ankhii owo waamupweteya



muteko, murokor'aka? Munrowa wira exeeni, munoorowa otthyawa mutthikele owaani, w'amaama, apaapa?"

Owo khwira, "Nnari, mulopwana. Kinrowa okhala ni yoowo."

<sup>100</sup> Nto miyo khwira, "Ankhi, mulopwana, mwakhalana aana araru wala axexe, hat'etthu yo waalyiha, ni muhirina hata muteko. Munrowa wira exeeni, omoomola?"

<sup>101</sup> Khwira, "Nnari, mulopwana. Kinimwiilipiha kikelele ohoolo. Ninooxintta, mwa enamuna emosa."

<sup>102</sup> Miyo khwiisoona oyeva. Nto miyo kaahoonu wira vekeekhai owo aanimpenta, ni yaaniphentanasa mmosa ni mukhw'awe. Miyo khwaathelihasa.

<sup>103</sup> Vano kaanittthuna osuwela nipuro aamuroihaly'awe. Mahiku vakhaani, miyo khimukoha muhim'aka, Doc, waari woowi. Owo khwira, "Murowe mpakha oNew Albany," epooma emosa ohitto wahu.

<sup>104</sup> Nto waattamela omurattthini, weiwo kaarin'aka exipwitta yoothukumanyiwa, weiwo kaarow'aka-wo khula nihiku okathi miyo—miyo kaary'aka mukhapeleli a eliinya. Vano okathi axirikha othene, yaakilaath'aya ethukumanne, n'uhimya ipwerwa ni itthu siiso, miyo kaakelaka mukaaroni khurowa omurattthini n'uvekela okathi ene yoowo, weiwe, ni kaanimusoma Bibilia aka, vathi va nipattuuxa nuulupale na exipwitta weiwo waari-wo nipuro n'ototoxiwa-wo iyuuma na khalayi. Naahikhala nikuttha na ivakawu sa khalayi saahiwe vaavo.

<sup>105</sup> Nto mmirav'ola aaronwe weiwo khuttotta evakawu emosa khupaka mukhora mwa yeeyo. Ni aahikuxa exoornaale ni ipitawu soopharihela.

<sup>106</sup> Akavi anuwela epitawu yoopharihela? Khaavo atthu a oKentucky va, nto. Ti, mukuxe nipattuuxa na papalawu, muhele musumari mwaamukhaani, erintta yaamukhaani. Vano nto mutthitte mu . . . Eyo ti epitawu yoopharihela.

<sup>107</sup> Vano, awo yaahelanse yeeyo mapuro othene. Nto owo aaroorowa waatotoxiwa iyuuma iwe khukuxa ikaruma vakhaani, khupaka evitto, wira aweleke. Ni aahittotta ikaaxa kamosa-kamosa sa khalayi, khupaka meesa. Nto miyo khuupuwela, nihiku nimosu, "Kinoorowa koone moota ankhalas'aya."

<sup>108</sup> Miyeeri soophiyaka mithanu na mosa eyo ehinatthi, kaahaatheliha mwaana muthiyana a E. V. Knight ni mwaana mulopwana a E. T. Slider. E. V. Knight, mmosa w'axilopwana oomalela othaaciri okhanle oMuro Ohio, ni, oh, oneettiherya ikaafirika suulupale siri iwe, simpaka mamp'ala ootekiwa khalayi-ru, ni sikina. Ni—ni Slider, E. T. Slider, t'a ekupaniya

ya mihaava ni ekokotto, aana a anamisurukhu. Vano kaahaathelihasa.

<sup>109</sup> Vano kaahirowa nipuro nimosa, khweeteetela isumana soophiyaka piili, n'utthikela mmuxaaxani n'ukokhora vamusawuni. Nto evuwelo yothene ni itthu sothene kitonko aka ovira-mo, voowooneya, kaahaana ovira-mo wira kaathelihase ale aili! Nto okathi akhumans'aya, vano, awo yaarisa... Anaitthoko ala akina axikhaani yeemelanse vale paahi ekatthi yaamukhaani memmo waarin'ahu ekhatera yaamukhaani ni olili waakhuniwa, masi oowaili yaathelihasiwe mwa niira nimosaru.

<sup>110</sup> Vano nto, nihiku nimosa, khuupuwela wira kinoorowa kaaxekurye anaitthoko ala oothaaciri. Awo khayaarina ovira muteko, axitiithi aya yaari anamisurukhu, yaahaatekelasa empa yooloka. Voohithepya, E. V. Knight ula, osulu, nno vamwaako, imasaneeta sawe ti sa ikilaate muloko ni xexe emp'awe yuulupale, vano munoowerya otthokelela muthinto xeeni w'empa awo ankhalas'aya-mo. Awo khayaarina ovira muteko. Awo yaanivahasiwa Cadillac ooreera khula eyaakha. Nto paahi, anamwane ookhala meekh'aya, ni yaahikhalana sothene saatthun'aya tu. Okathi oronwaaka weiwo nihiku nimosa...

<sup>111</sup> Vano, kaaphiyerenrye sayi waasuwela, mmosa w'axipatthani aya aari mpatthani aka ooreera murima. Hiyo othene p'uhimya wene neettaka vamosa. Nto ti siiso kiphiyenry'aka waasuwela, okathi wathun'aya wira kaathelihe.

<sup>112</sup> Vano miyo khurowa waaxekurya. Miyo khukhuma muFord mwaka a khalayi, ota, khuwela ivitto. Nto—nto miyo khuwela, khwaattamela vakhaani, vano miyo khuwiiwa. Nto vekeekhai awo yaamwaakhulana. Yaanelana ehace mmosa ni mukhw'awe. Yaarowane wiina. Owo aari mwali mmosa ooreera saana. Ni aari p'uhimya wene mmosa wa mapwiyamwene ala ooreera. Owo aahaakhela itthuvo sinci-ene iwe, ni aahaakhela ikaaro ni itthu, mwaha w'okhala pwiyaamwene ooreera. Vano miyo khwaaweha, nto mmosa aakilanthe nlotho nimosa nto mukina nimosa, yaakhulanaka mwaha wa mmiravo mmosa ole iinanne awe, wala mwali mmosa, etthu siiso.

<sup>113</sup> Okathi waattamenly'aka, awo arootuphasa naanaanoru khuvarana mmosa ni mukhw'awe ipante soovirikana, ni ma—matat'aya, ipante soovirikana, khurwa yeettasaka erowaka vamukhora. Khwira, “Vano, sayi vo, Munna Branham! Muniviriha sayi mahiku?”

Khwira, “Vooreera. Nyuwo othene muniviriha sayi?”

<sup>114</sup> Nto, “Oh,” owo khwira, “Miyo—miyo...Khaninreere ohakalala. Kahi siiso, oophentiwa?”

Vano owo khwira, “Ayo, oophentiwa.” Munnona?

115 Vano, moone, munoothererya etthu ehikhanle ekeekhai. Vano, khivanweryaneya woora mooro woopintariwa, ntoko ikereja kamosa-kamosa iya sineererya omupintari pentekosite, wa etthu yiiraneieye iyaakha ekonto emosa sivinre wala iyaakha ikonto piili. Khivanweryaneya woora mooro woopintariwa. Pentekosite t'ekeekhaixa olelo ntoko saary'awe okathi ule. Munnona? Ayo. Mooro nlelo onoomora. Kuhiyo mooro woopintariwa. Owo Mooro w'ekeekhai.

116 Vano, awo, awo yaarisa vale. Munnona? Miyo—nkaarowa otthuna okhala siiso.

117 "Oh," miyo khuupuwela, "moosuwela, vaavale vale vamurivathi ni epantte ekina ya muro, ti vaavo anaitthoko ala akina yaamalenly'aya-vo." Miyo khuupuwela, "Esaapatu emosa makaaripi kinookhuruwela weiwe kawoonase moota anvirih'aya mahiku."

118 Tivo miyo, kiriipaleene wiitho, ni makakawu oriiipaleene, ni ikaruma saka. Miyo khuupuwela, "Kinoorowa waathurumela." Miyo khurowa murima-murima ntoko kaaphavela ittiyelelo saakwaseieye mwaha w'overunya wala etthu siiso, vano keettaka kittharaka efiiyu ya telefooni, ifiiyu sa nerexiia sinthara muro. Nto vale aari Chevrolet a khalayi, aapwehiwe wiitho w'empa. Voophiyaka eyaakha emosa ohoolo waya, numala waathelihasa. Ni yaahikhala e—e . . . Mukhora waari woohuliwa, ni kaaniwerya owiwa elavulasaka. Vano enkhala ntoko etthu y'enamirima miili, masi kaahaattamela voophiyerya mpakha kaawery'aka wiiwa, wona etthu yaahimyas'aya. Miyo khukhala vale. Nto kaatthuna kisuwele paahi, mmansaka.

119 Okisivela otholathola saana ni okupali wira koosuwela etthu enihimy'aka. Ti siiso kiniir'aka mwaha wa Masu a Muluku. Eyo Ekeekhaii, wala kehiyo Ekeekhai? Owo onoosuka Masu Awe, ahiiso khansuka Masu Awe? Owo aahisukeke Masu Awe, weso Owo kahi Muluku. Munnona? Owo aasukaka Masu Awe, Owo Mulukuu. Munnona?

120 Vano siiso miyo kaatthuna koone moota yaavirih'aya mahiku. Nto miyo khweetta murima-murima oloomoni, kiitaka saana. Miyo khumwiiwa owo iiraka, "Oh, oophentiwa, miyo kaanitthuna saana, woothumelani ile."

121 Owo khwira, "Vano, nkawehani, oophentiwa." Owo khwira, "Evistiitu ila eri saana." Owo khwira, "Vano, ela eri saana." Khwira, "Miyo kinnixukhuru mwaha wa yeeyo. Masi moone . . ."

122 Miyo khwaattamela murima-murima, wira kiwerye oweha vamunyattani, vaavo mukhora waahuliw'aya vale muvakawuni. Nto owo aari vale, okilante-ene vale, vano owo ottuli wawe; moonoo awe omupatikhale-ene, ni ole moonoo awe omupatikhale-ene. Ni owo aawanre ixapheyo iya sa ekhankhala yookhuneleya vathi, ni aahihela mwiithe mwaamukhaani, khuupaanyerya

vathi, osulu waya, khukumiha exeke awe y'oliva-no, mwa yeeyo. Owo—owo aapweha vameesa. Khwira, “*Khata* ti wa solya. *Khata* ti wa sekuuru. Ni *khata* ti wa ekaaro.” Ni khayaaweryasa olikanyiha itthu sothene. Khuphiyerya osuwela wira, owo aahoono evistiitu yaamukhaani mulooxa ya efiituru, ahaareery'awe oweha isumana piili, yaakhala etoolare emosa n'itthu. Owo aatthuna othuma. Khwira, “Ahe, oophentiwa, mwaamukhala oophwaneliwa memmo.” Nto owo khwira . . .

123 Owo khwira, “Masi, oophentiwa, miyo—miyo kookhalana evistiitu. Miyo—miyo vekeekhai nkimphavela.” Munnona? Nto muhan'ole mwaamukhaani . . .

124 Miyo khususa, khuweha osulu. Kaaniwerya omoona na—namukattha vasulu v'empa ekina. Miyo khweemela vale khuweha, minuutu vakhaani. Miyo khuupuwela, “T'ani okhanle mulopwana thaaciri?” Miyo khuupuwela, “Vaakhanle wira, Bill Branham, mwaatthunne othanla nipuro xeeni, mwaarowa woowi?” Wa miyo, nkaarowa okuxa etthu ile yooreera vasulu va mwaako. Kaarowa othanla mukhalel'ola vathi va, ntoko namatthokiha eetthoko eekeekhai, mutthu aarowa okiphenta ni okhala ni miyo, mutthu aarowa otthuna opaka etthoko; kahi owaatani mwaha wa itthu sothene, mwaha wa itthu sooreerexa; ni mutthu aarowa okhala ni nyuwo, mpantte wa nyuwo.

125 Eyo okathi wothene yaahikhala ni miyo, moota yaary'aya. Mmosa aamuthanlale mwali ooreera, mmosa aathanlale mukhalelo wa murima. Vano, eyo ti enamuna emosa paahi mwaakhanly'anyu othanlaka. Yoopacerya, mphavele mukhalelo wa murima; vano nto, vakhala wira munnimpenta, vaareera.

126 Nwehe, Atamu oopacerya a Muluku khaarina hata ethanlelo, ya mwaara. Owo khaarina ethanlelo. Muluku aaroomupakela paahi mmosa, ni owo khaaphiyenrye omuthanla. Vano ninnoona wira owo aahimuhapuxela ota wa Masu a Muluku. Owo khaphiyenrye olompa mwaha wa mwah'owo. Owo—owo—kahi ntoko nyuwo ni miyo. Owo khaarina ethanlelo. Nto emaara ekina, mwaha wo wira yeeyo, owo aahimukumiherya ota wa opuro awe wooloka ntoko mwaana a Muluku. Nto iirale siiso mwaha wo omoonihya enamuna ya naanaanoxa y'okhala, etthu emosa vekeekhai yahaatthuneya wira yiire. Masi mukhalelo awe waahooniherya wira aahivonya. Mawoko awe ni sootthuna sawe saari soovonyeya tu. Nto khumukupaliha, mwaha wo waakanyerya wawe, wira waarya wa vano owo aaphwanyaly'awe, yoowo waari woovirikana ni Masu a Muluku, waari enamuna yooreera okhala.

127 Ni athiyana akavi olelo, voohihiyana, alopwana, yaarowa owerya omukumiha muthiyana ooreera murima wa Muluku, wala omukumiha mulopwana ooreera murima wa Muluku? eereryaka omuleela wira, “Etiini ila, nyuwo amiravo aPentekosite, etiini iyo,” eniiriwa, “oh, eyo ti y'enamuna ya

khalayi, eyo ti yooxeleliwa, muhaamini yeeyo.” Vanreerela mulompe saana muhinatthi omuthela mwali uwo. Nkincala moota ory’awe ooreera. Etthu emosaru wa mulopwana.

<sup>128</sup> Owo aahimukupaliha okhuma mwa otthuna wa Muluku nto khumwiiriha owo wira etthu ahaarin’awe wira, nto, mwaha wa yeeyo, khuruuhela okhwa nloko nothene n’atthu. Tivo Bibilia onimukhoottih’awe muthiyana wiixuttiha, wala olaleya, wala weettiherya Masu a Muluku, mwa hata enamuna.

<sup>129</sup> Koosuwela, axinna athiyana, anci-ene a nyuwo muniira, “Apwiya aakiihana wira kilaleye.”

<sup>130</sup> Nkinrowa ovaanyihana ni nyuwo. Masi kinrowa wooleelani, Masu anihimya wira muhiire. “Owo ahiixuttihe, wala orumeela eyuulupale, masi akhaleke oomaala.”

“Ahe,” nyuwo muniira, “Apwiya aakileela wira kiireke.”

<sup>131</sup> Miyo nkinihoverya eyo hata vakhaani. Muhiiwa Mutthak’aka ohiyu uwo mwaha wa Palaamu? Palaamu aahaakhela otthuna, woopacerya ni wookhuma wa Muluku, “Muhiire.” Masi owo khutthikela akhanyereryaka mpakha vookiserya Muluku omuleela wira iire.

<sup>132</sup> Muluku pooti woottthuniheryani olaleya. Miyo nkinihimya wira Owo khotthunihenrye. Masi khentthariha Masu Awe ni ethhokiheryo yoopacerya. “Maana eri wira muthiyana akhale oowiilela, siiso ntoko sinihimy’aya ikano.” Eyo ekeekhaii. Tivo, kheri wira aire.

<sup>133</sup> Vano, nwehe-tho moota mwaakameliwa a erutthu onlikan’aya ni a erooho. Masu anihimya, wira, “Muthiyana opattuxeriwe mulopwana, nto kahi mulopwana opattuxeriwe muthiyana.”

<sup>134</sup> Vano kinrowa olavula, ni mwaha wa xeeni, mwa minuutu vakhaani, mwaha wa Mwaakameliwa a Kristu, masi kimphavela owoonihani mulipiheryo aya.

<sup>135</sup> “Muthiyana opattuxeriwe mulopwana, nto kahi mulopwana wa muthiyana.” Mwaha wa yeeyo, vathi va ikano sa khalayi, waatteya waari woolikana ni ikano. Nkanweheni Davidi aaphwanyaneya vale n’athiyana imiya thanu, ni Bibilia ohimmye wira, “Owo aari mutthu ntoko saatthun’aya murima wa Muluku.” N’athiyana imiya thanu, ni Salomoni n’athiyana ekonto emosa, masi khaavo hata mmosa w’athiyana ale aakhalana iy’awe mukina.

<sup>136</sup> Mphwanye efiit’aka ya *Othelana Ni Omwalana*. Eyo, vasulu va mwaako oTucson, nno woohikhala khalayi, miyo kaari vasulu vale kivekelaka mwaha wa yeeyo. Khuhiiwa ixikola, wira niwehiwe Nlumi nle na Mooro nirukureryaka mwaako ntoko efunttuli, nno ni nno, osulu ni vathi. Atthu vakhiviru nno annisuwela, iwe, ni yaahoona Nenlo; ni Nlo...okathi Owo okihimenry’awe Ekeekhai ya sookoha sa othelana nno ni

omwalana. Wakhala moonelo onrowa epantt'ila nno, ni mmosa onrowa epantt'ile, ehaana okhala Ekeekhai nipuro nlo. Nuumala Ikanyeryo iye Thanu na piili, Owo aahooniherya Ekeekhai ya yeeyo.

<sup>137</sup> Nwehe, vano, owo aahaana okhalana iy'awe mmosa paahi, okhala wira, "Muthiyana opattuxeriwe mulopwana, nto kahi mulopwana wa muthiyana." Athiyan'ale othene imiya thanu yaari axaar'awe Davidi paahi, nto nlo naari nlikanyiho. Okathi Kristu onrow'awe okilaathi Veehicensi oMileenyu, Mwaakameliwa Awe khonrowa okhala mutthu mmosa, masi anrowa okhala ikonto miloko miloko sene, Mwaakameliwa, othene mwa Mmosa. Nto Davidi aahikhalana axaara anci-ene, ntoko atthu, masi othene aya paahi vamosa aari mwaar'awe. Ntoko Erutthu yothene y'alipa-oowaamini ti Mwaakameliwa a Kristu, 'okhala wira ti Yoowo, muthiyana. Owo aari ti Mulopwana. Vano, hiyo nipatuxeriwe Kristu. Kristu khopakiwe mwaha wa hiyo.

<sup>138</sup> Ti yeeyo enerery'ahu wira olelo muliivuruni mwahu soolempwa, ti weererya okhaliha Masu (yaawo okhanle Kristu) wiilikanyiha ni hiyo, ohiya hiyo ophavela wiikhaliha mmansihu oolikana ni Masu. Iwo p'uvirikana waya.

<sup>139</sup> Mulopwana aamuthanlaka mwali a emusi khata, owo ahilipaneke oreera, maana oreera onniwoka. Ni oreera, oreera wa vano wa molumwenkuni, ti wa xetwani.

"Oh," miyo kinnimwiwa mutthu wira iwo, "phoole va, mulaleyi!"

<sup>140</sup> Miyo kiniira wira itthu iya elapo ela ya vathi, siniihaniwa sooreera, vekeekhai ti sa xetwani. Miyo kinoowooniheryani. Vano, voothariha yoohimya yeela, nrowe nitthokelele Masu a Muluku oowaarya, noone vakhala wira t'ekeekhai wala nnari. Ni amosa-amosa wa nyuwo athiyana muntthuna mukhaleke ooreerexa! Nkoonani onikhum'aya-wo. Wopaceryani, ninnoona wira Satana aari ooreera mpakha woottha Malaikha. Nto owo aari Nlaikha noomalela oreera wa othene aya. Ehooniherya, wira eyo enikhuma mwa xetwani. Miruku soohimya, Salomoni oohimya, "Oreera ethiruu." Ti yeeyo. Etampi ti yoophwaneliwa. Vekeekhai, ti siiso. Ti yookuxa murima.

<sup>141</sup> Kintthuna kookoheni, ni wooleelani etthu va. Kintthuna wira nwehe, minuutu vakhaani. Mwa mixovo sothene molumwenkuni, axipalame, axinama, ninnoona wira mwa ekumi y'axinama, othene waahiya atthu, ti oolopwana okhanle ooreera, nto kahi oothiyana. Mwaha wa xeeni? Nkawehani e...Nkawehani etthove yoolopwana, e—etthove yoolopwana yooreera yuulupale ni manyaka aya, ni etthove yaamukhaani yoothiyana etthove esiisi. Nkanweheni mwa—mwalyakhu oothiyana, mwalyakhu, mwaamukhaani a malepa, ni muthupi muulupale a mapururu ooreera. Nkanweheni mwaapalame

oolopwana ni mwaapalame oothiyana. Nkawehani nratha noolopwana ni n'oothiyana. Munnona? Nto khuuvo moxovo mmosa molumwenkuni, opakiwe, onwerya woototha ni okhala a vathi ntoko muthiyana.

<sup>142</sup> Vano, munna muthiyana, muhivenye munakhuma. Mulipelele paahi mpakha niiwe emalelo ya Yeela. Munnona? Munnona?

<sup>143</sup> Khiivo hat'etthu, hata oothiyana omuhiya muthiyana, okhanle okhalaka oohifayi. Nyuwo munimwiihana mwalapwa "mwalapwa oothiyana," muniiana ekuluwe "e—ekuluwe yoothiyana," masi, va olakeya, awo aakhalanasa olakeya waavikana nuusu n'aratti a isineema ari va. Iyo khasihiyo etthu ekina woohikhala olakeya.

<sup>144</sup> Nto muthiyana aari mmosa aarukunxiwe, khukhala oohononeya. Eyo ekeekhai. Munnoona otthu onimuroih'aya-wo oreera? Vano, mwaha wa yeeyo, olelo, athiyana antep'aya oreera. Mmukuxe Pearl Bryan, mootoko woona elatarato awe? Onikhalihiwa oreera wuulupale wa wAmerika. Khaavo hata naxikola muthiyana a khula exikola ahaarowa o—omuhiya ottuli. Mwaahisuwela wira ehaana okhala siiso? Mwaahisuwela wira Bibilia onnihimya wira ti siiso yaarow'aya okhala?

<sup>145</sup> Mwaahisuwela wira ottheke oruule n'athiyana wopaceryani? Ni ottheke. . . Emalelo aya enrowa omalela enamuna emosaru, athiyana ephwanyaka ohoolela ni yaahoolelaka alopwana, ni siiso. Moosuwela wira Yolempwa ennihimya yeeyo? [Muthukumano oniira, "Amen."—Mol.] Moosuwela, wira nihiku oniwar'awe ikuwo sa mulopwana, ni omettha maihi awe, itthu sothene iyo ti soovirikana ni Masu a Muluku. Ni moosuwela wira owo onthoonwerya ekereja? ["Ayo."] Mwaweha itthu siniir'aya athiyana, munimoona etthu ekereja eniir'aya. Eyo vekeekhai ekhweeli. Vano, vano, ekeekhai saana ntoko Masu a Muluku akhanly'aya eekeekhai.

<sup>146</sup> Khaavo oothiyana mmosa opakiwe okhanle ookhalaka vathi ntoko muthiyana. Ni nnakhala vo, mwa yeeyo, opakiwe ookhu- . . .

<sup>147</sup> Owo khaakhanle mopattuxiwani moopacerya. Oothiyana akina othene ari mopattuxiwani moopacerya: axipalame, oolopwana ni oothiyana; axinama, oolopwana ni oothiyana. Masi, mwa ekumi y'atthu, Muluku aamupanke mulopwana mmosa paahi, vano Owo khukumihwa mwa yoowo. Nto muthiyana ti yoopattuxiwa ekhumme wa mulopwana, okhala wira Muluku khaakhalinhe etthu ene eyo. Musome Soolempwa. Vekeekhai ekhweeli. Muluku, nnari, mulopwana, mwa opattuxa Wawe woopacerya. Muthiyana oroopwehiwa-mo mmo.

<sup>148</sup> Masi owo aaweryakaru wiikhaliha saana, otthuveliwa xeeni wuulupale orin'awe omuvikana mulopwana. Owo oniheliwa nipuro no wehereriwa. Mwa yoowo ohoorwa okhwa. Owo

t'okhanle namattheke wa okhwa wothene. Masi nto Muluku khurukunuwa khimurumeela mmosa wira ahokoloxe Ekumi; khumuruuha Mwan'Awē mwa muthiyana, mmosa oowiiwelela. Masi mmosa ootakhala t'o—t'otepa onanara okhanle; khiivo etthu ekhanle y'okhalaka ya vathi.

<sup>149</sup> Kayini, mwaana a Satana, oona wira Muluku aakupali ereerelo. Owo onnuupuwela olelo. Kayini aari mwaana a Satana. "Oh, vano!" nyuwo muniira. Khaninrowa ohimya emosa-emosā sa yeeyo, masi mukihyē paahi koolakiheryeni yeeyo. Bibilia ohimye wira owo "aari a mutakhali." Vano, eyo ennimaliha mwaha. Vaareera. Vano, owo aari mwaana a Satana. Nto owo oonale wira, omuteka altaari ni omukhalihā ooreera saana wira akokhorele, wira eyo yaari etthu Muluku aarow'awe ottittimiha.

<sup>150</sup> Awo anuupuwela, anuupuwela etthu emosaru olelo. Vekeekhai. Ela, "Hiyo ninteka empa yuulupale. Hiyo ninookhalana miromolelo suulupale. Ninooteka empa yuulupalexa nikhālāne atthu oowara oratteenexa, anamukuttho oolakeyaxa." Imaara sikina Muluku ori imiilya imilyawu muloko ottaiwene wa yeeyo. Ti yeeyo. Enamwi, ekhanleene ekereja.

<sup>151</sup> Vano, vakhala wira Muluku ontittimiha okokhoreliwa paahi, onaxariya, mukuttho, Kayini vekeekhai aari naxariya ntoko Apeli. Masi waari mwaha wo wuupululeliwa, owo aasuwenly'awe saana wira khayaari masa axitiithi awe yaakhuuraly'aya.

<sup>152</sup> Kinrowa ohimya etthu va ehiniweya oratteene wa murumeyi, masi kinoorowa ohimya, khula enamuna. Kinniwiwa ala akina ehimya itthu, etharihaka ixepwere. Kahi kintthun'aka. Miyo koohimya ela, nnya, "Vaakhanle wira okhuura masa waaniwiiriha athiyana osuwela wira ari pwtipwiiti, vaanireerela waavaha-tho masa." Munnona? Munnona? Uh-huh. Mukilevelele mwaha wa yeeyo, masi wira erukunxe. Miyo kihookhalihani oowuukhuwa va, ni olavula mwaha w'athiyana, ni sikina. Miyo—miyo—miyo kintthuna wovolihani minuutu mmosa, wa ele enoorwa vootharelana. Vano, nwehe, nyuwo . . . Khayaari masa. Hiyo noosuwela eyo.

<sup>153</sup> Ekereja mahiku ala enikhala, ni soowiira saya, ntoko soowiira sikina sothene soopakiwa n'atthu, sinikhala sa siyensiya. Awo aneererya okhalihā ekereja ya siyensiya, mwa ovara murima wa ilatarato ni anamukattha aalupale. Nto ti yoonanara saana wira aPentekosite arookela muhāpo yoowo. Mwaamukhala saana ni ekoma, vanlothoni, ni Eroho ya Muluku yoorukurenryeni. Masi muneererya wiilikanyihā n'akina aya, okhala wira muhiithokiha. Eyo ti yiirihale. Munnona? Ikereja simphavela okhala sa siyensiya.

<sup>154</sup> Nto muupuwele, okathi mutthu oniphwany'awe muruweryo ni siyensiya, owo oniwmiisiiva mmansawe khula nihiku. Okathi opank'awe oka wa kapwitthi, nkawehani etthu wiiraly'aya.



Vapakaly'awe ekaaro, enniiva ovikana siniiv'aya oka wa kapwitthi. Vano owo ookhalana ekapwitthi ya itroxeeniyu. Onrowa wira exeeni ni yeeyo? Ekeekhai.

<sup>155</sup> Ni ti siiso ery'aya ekereja, yaaphavelakaru ophwanya etthu ni siyensiya, ni etthokiheryo yoopakiwa ni mutthu, eyo enoorihani ottaiwene wa Muluku, ni mookhwaani, ovikana saary'aya wopaceryani. Ti yeeyo. Muhithanle ekerej'anyu ntoko mwaathanlaly'anyu amwaar'inyu. Munnona? Etthu siyensiya iirenly'aya yaari yooreera, masi vanreerela mukhale ottaiwene wa ekerej'anyu mwa yeeyo; owo opanke opintari, oka, ni itthu iya sothene sikina. Muthanle mwaha wa mukhalelo wa Masu Awe.

<sup>156</sup> Vano nrowe nimulikanyihe mwaakameliwa eerutthu olelo ni ele enihaniwa ekereja mwaakameliwa y'olelo. Mmulikanyihe muthiyana, onrowa otheliwa olelo.

<sup>157</sup> Vano, nwehe paahi etthu siyensiya emwiirinh'awe. Owo onookhuma, yoopacerya, ni maihi awe oometthiwa, ni emosa wa ivaseryo iya sa maihi sa Jacqueline Kennedy, moone, wala etthu siiso. Nto nyuwo moosuwela etthu enihimya Bibilia? Bibilia hata onnimuvaha mulopwana, owo athuna vale, ehaakhi y'omoomola ammwalanaka owo aairaka-ru siiso. "Owo muthiyana oohittittimiheya, amettharu maihi." Bibilia ohimye siiso. Ekeekhai. Khamwaasuwela yeeyo? Ha? Oh, ayo! Miyo nkinreere olaleya oCalifornia wira khamunsuwela yeeyo. Ti yeeyo. Oh, ayo! Enikiphwanyihani yooreera? Awo animwiira, khula enamuna. Khamukhanle okuxaka ekuluwe khurukunxa nsina, khukhalihia epwittipwitthi. Nwehe.

<sup>158</sup> Munoorowa okinyokha nuumala ela, masi munoorowa osuwela Ekeekhai. Munnona?

<sup>159</sup> Nkawehani. Nrowe nilikanyihe ela. Owo onoorwa va ni wiipintari wothene, etthu ohikhanly'awe, mwaakameliwa a vano. Aarapin'he-ru wiitho wawe, owo aammuthyawa, khino. Aamuwiivani mwaha w'otuthuwa, akumiha-ru itthu iyo sothene mwa yoowo. Nto siiso t'ery'aya ekereja ni, owiitho wuulupale woopitariwa, Max Factor a teyoloxiia oomalela. Uh-huh. Soopili sirina wi—wiitho wooreera, wo woothererya mwa seiyo, oreera woopakiwa ni mutthu nto kahi oreera woopakiwa ni Muluku. Khuuvo hata mukhalelo wooreera wo waatta mwa hata emosa.

<sup>160</sup> Nwehe, siiso ntoko Satana, yoophiyerya owoka-no, mmulikanyihe mwaakameliwa a vano vano n'uwu: onaawara akaputtula, onimwiipintari, onimettha maihi awe, oniwara ikuwo sinkhala ntoko sa mulopwana, ni omwiivelela pastore omuhimenrye wira saari saana. Owo namawokaa. Owo onoorowa ohaawa mwaha wa yeeyo mapuro ale wu. Ti yeeyo. Oniira yeeyo wira awokeke, wira akhale etthu ohikhanly'awe.

<sup>161</sup> Ti siiso ekereja eniir'aya, enkhalana itiitulu suulupale sa DD. Ph.D., LL.D. Vano nyuwo muniira, "Pastore ahu *t'ila, ele,*

ni *ekina*,” khino khonsuwelexa sa Muluku omuvikana Otentoote sinsuwel’awe ohiyu wa wEjitu. Ti yeeyo. Ekeekhai. Musuwelelo mmosa wa teyoloxiia ooseminaariyu iwe, ni khonsuwela etthu ya Muluku nnakhala.

<sup>162</sup> Ekereja ya vano ni wiipintari waya wa teyoloxiia, hmm, sirina athiyana aya ni ovuwa waya wothene woometthiwa, ni ariiki aya kamosa-kamosa ni pastore awo arin’aya, ntoko Yesapeli vakhala wira ootoko okhala mmosa. Maihi oometthiwa, akaputtula, wiipintari, sothene sootthokihwiwa mwa esivelelo ya teyoloxiia, ti siiso ekereja emphwanyane’aya. Ekeekhai. Masi mukhalelo aya wa erooho ori ottaiwene w’okhaliha etthoko Yesu Kristu onrw’awe waakhela.

<sup>163</sup> Aakhanle muKristu aarowa omuthela muthiyana siiso, eyo enooniherya wira oomora mwa mahala. Osiveliwa wawe ni Muluku ni osiveliwa wawe ni etthoko, mwa enamuna vaatthuney’aya etthoko okhala, ori ottaiwene, amuthanla-ru muthiyana siiso. Nnari, mulopwana. Vekeekhai owo khaarowa ophwanelela osiveliwa wa muKristu. Mukhalelo awe wa erooho ti wa vathixa, ookhwa, mwa oreera wa miromolelo ni soowunlela sa molumwenkuni.

<sup>164</sup> Vekeekhai ti vaavo ekereja emphwanyaney’aya olelo, yoomutumiherya Satana mukhalelo aya ovahiw’aya ni Masu, mwaha w’etiini ya siyensiya epakiwe ni mutthu. Okathi, owo aarin’awe ehaakhi, ntoko ekereja ya Muluku, wira ekhale ni Masu a Muluku ni okhalana Eroho Yowarya evaraka muteko eriyari aya, elupanyaka Erutthu vamosa ni Masu ni ophenta wa Muluku. Ohiya yeeyo, eyo yootumiha ihaakhi saya s’eyuulupale, ntoko Esawu, khukuxa muromolelo, onimuhiya wira yeeyo, etthu p’itthu entthun’aya, khweeli, wira ekhale yoosuweliwa paahi ntoko mai aya siiraly’awe oNicea, Rooma. Masu a Muluku!

<sup>165</sup> Oh, moota eyo ekenly’aya vapuwani vahu va Pentekosite! Ti yookhupanyerya, masi yookela.

<sup>166</sup> Nwehe, minuutu mmosa paahi, fereera mukereja Katolika. Muthiyano’owo, wira akhale fereera, ni waakhela ekuwo ele yookiserya, owo vekeekhai ohiivahererya ekerej’ele. Owo ori (munepa, erutthu, ni erooho) etthu ya ekerej’eyo. Owo khorina muupuwelo awe mwaneene. Owo khokhanle okhalanaka, owo aakhelaru ekuwo ele yookiserya, hata muupuwelo awe mwaneene, hata otthuna wawe mwaneene. Nkoonani va, wira Satana onikhaliha ethepyelo awe, ntoko y’ekeekhai.

<sup>167</sup> Ekereja y’ekeekhai ya Kristu, Mwaakameliwa, ehiivahererya saana wa Yoowo ni Masu Awe oolaiheriwa, mpakha muupuwelo ene yoowo waari mwa Kristu okhala mwa nyuwo. Evirikanelo xeeni!

<sup>168</sup> Nto hiyo ninniphwanya olelo, wira, ekereja ya vano, ekereja ya vano ya molumwenkuni, ekereja ya vano ya molumwenkuni

nave-tho wira Ekereja ya erooho soopiili soorupala, wira yaayare aana alopwana.

169 Emosa aya, oyara wa muromolelo, enrowa oyara, nimosa wa . . . nihiku, na . . . mahiku ala, oMwaataano wa Ikereja sa Molumwenkuni mothene, yeeyo enrowa omukumiherya olumwenku nwanani a Kristu, muhina mwa muromolelo. Eyo Ekeekhaii yoolikana. Khino miyo nkinrowa okhala mukumi wira koone. Kookupali wira kinookhala. Masi, nyuwo amiravo, muupuwele wira moomwiiwa murumeyi ohimya yeeyo. Vookiserya enrowa omalela ni yeeyo. Nto eyo ekanyeryo ya nxeni, okathi enrow'aya okhaliha Mwaataan'owo wa Ikereja sa Molumwenkuni. Nto enrowa omuyara mwan'aya, nwanani a Kristu.

170 Ekina erupanle Masu a Muluku nto enrowa oyara Erutthu, Erutthu yoomalela ya Yesu Kristu, okhanle Mwaakameliwa. Erutthu ya Kristu khenatthi omalelihiwa nlelo. Akavi ansuwela yeeyo? Mulopwana ni muthiyana ankhala mmosa. Ni Kristu Erutthu emosa, Masu. Mwaakameliwa ohaana okhala ehalelo y'Erutthu yeeyo. Nto soopiili, vamosa, sinkhala-tho Erutthu emosa. Ntoko Atamu saary'awe wopaceryani: mulopwana, mwaar'awe, ari mmosaru. Vano, Owo, Mwaakameliwa eekeekhai, oowiivaha saana wa Yoowo, ohinrumeela hata muupuwelo Awe yoowo. Muupuwelo Awe, vekeekhai, ti otthuna Wawe, ni otthuna Wawe Masu Awe.

171 Vano nkanweheni ole oniihaniwa mulipa-oowaakameliwa oothanliwa ni mulopwana, nto mmulikanyihe ole a erooho ni a erutthu olelo, Yesapeli a vano oottetekhiwa ni Akhabi awe, oreera wa Max Factor, itthu sothene. Nkawehani ekereja, enamuna emosaru, masi namararuwa a Masu a Muluku mukumi; miromolelo suulupale, ipa suuupale, musurukhu munci-ene, ilivelo sinci-ene, sothene soowiivahererya. Atthu anemela vapulpitu ekhaliheryaka wira eyo eri saana, ni waahiya oohittharuxiwa. Owoka paahi, ti yeeyo tu. Vekeekhai Okathi wa Ekereja ya Lawotiseya ohinoona, siiso Bibilia ohimaly'awe wira yaamukhala. "Khwira, 'Ka thaaciri. Kikilanthe ntoko pwiyamwene. Khiivo enkithowa.' Nto khamunsuwela wira mwa masikhini, oothoiwa, oohoona, ootakhaliwa, oohiwar'etthu: nave khamunsuwela." Eyo yaahikhale SIISO ANIHIMYA T'APWIYA, Wiisuupulula 3, nkinatoko osoma Yeeyo. Ti yeeyo ekhanly'aya, nave khensuwela! Muupuwele yeeyo.

172 Mwaamuhimenrye-ru mulopwana wala muthiyana, mphironi, ahiwaranse etthu voomalela, ni waaleela wira khawanr'etthu, vano awo khunaira, "Kahi mwah'anyu," vano, yookhala ehilonke mmuupuweloni nipuro nlo. Yookhala etthu ehilonke ni muupuwelo aya.

173 Ni mwaaweryaka osoma Masu a Muluku, moota vaatthuney'aya atthu wira, ni opatiis'ula wa Eroho Yowarya hiyo

nrrin'ahu olelo, ni, atthu, vano, awo animoowehani ntoko wira muroovahuwa. Nyuwo munimwaahimeerya: "Muhaana..." Wira ahaana oyariwa vasya. Wira ahaana omwaamini Bibilia.

<sup>174</sup> Awo aniira, "Eyo yaari echantisi y'aYuta, sa iyaakha sivinre. Ekerej'ahu yookhalana ephiro ene." Ootakhaliwa, othoiwa, oohoona, oohiwar'etthu, nave hata khansuwela. Exeeni...Ni Bibilia ohimmye wira owo ti mukhalelo yiikelinh'aya-mo.

Moota xeeni profeta eekeekhai aarow'awe ovonya woona yeeyo? Miyo nkisuwenle.

<sup>175</sup> Simpuruleya sikelaka mukereja mwahu sothene, mapuro othene. Nkawehani paahi, mwa etthunelo ya vano tu. "Namuttompe a khalayi ni an'awe athiyana," a Wiisuupulula 17, onaavaha atthu "asikhini, oohoona, othoiwa" mwiixuttiho awe wa teyoloxiia woovirikana ni Masu a Muluku. "Ni mwa yoowo saahiphwanyiwa minepa s'atthu ipottha, ni alopwana n'athiyana a—a mapuro othene." Ohiya waavara murima atthu. . .

<sup>176</sup> Kristu onlipiherya Masu Awe, yeeyo enaavara murima atthu. Owo khonaavara murima atthu mukereja sikhanel soovariwa murima ni miromolelo sulupale ni soowiira suulupale, ni ivitikavitika suulupale ni itthu sootikiniha. Masi Masu a Muluku animuvara murima Mwaakameliwa a Kristu.

<sup>177</sup> Vano nwehe. Ti yoocaley a o—oweha moota e—ekereja emphavel'aya waavara murima atthu ni ikuwo sooreera ni atthu aniipa mukoraaleni oowara, ni athiyana arina maihi oometthiwa ni wiitho woopintariwa. Nto awo anuupuwela wira. . .Ni yiipa ntoko Nlaikha. Anootha ntoko xetwani, aneettasa iwo ohiyu wothene ntoko wiina, ntoko wira kehiyo etthu. Nto ti yeeyo anuupuwel'aya, "Khiva mulattu. Ti yooreera." Masi, moone, ethepyelo. Awo kahi Masu a Muluku.

<sup>178</sup> Enamwi, Mwaakameliwa onimuvara murima Muluku, mwaha wo weettela Masu Awe. Vano nwehe. Vano nrowe nimuwehe Kristu.

<sup>179</sup> Nyuwo muniira, "Ahe, vano, mulipelele minuutu mmosa, anghi oreera nno nyuwo munihimy'anyu?"

<sup>180</sup> Bibilia oohimya, mwa Yesaya 53:2, wira, varwiiy'awe Yesu, "Owo khaareerenle, wira nimutthuneke." Ekeekhai? [Muthukumano oniira, "Amen."—Mol.] Khaareerenle. Vaakhanle wira Owo aarwiiye ni ereerelo ya molumwenkuni, ntoko Satana siry'awe olelo, atthu yaamuthukumana emurukurerye Yoowo ni omukupali ntoko awo aniirel'aya ekereja olelo. Yaamwiira emwaaminni ene Yoowo, emwaakhenle-ene, ntoko sinimwiirih'aya Satana olelo. Vekeekhai, yaamwiira. Masi Owo khaarwiiye mwa enamuna yeeyo y'ereerelo, masi Owo kweekwe onoorwa mwa ereerelo ya mukhalelo. Iwe, Kristu khaari Mutthu, ooreera, muulupale, a ikuru ni ookhomaala. Muluku khonthanla enamuna yeeyo.

<sup>181</sup> Kinnuupuwela emaara emosa profeta aaronw'awe o—omuthanla mwene, wira amukhalihe mwene mwaana a Yese, wira akuxe opuro wa mwene mukina, Sawuli. Vano nto Yese khimuruuhela, mwan'awe, muulupale, ooreerela. Owo khwira, “Ekhara enookhala saana, mmuruni mwawe.”

<sup>182</sup> Profeta khurowa omuyeeherya makhura. Owo khwira, “Muluku oomukhootta.” Ni Owo aahimukhootta khula mmosa a yaawo, mpakha omuphiyerya mutthu mmosa mwaamukhaani, oomora makhata, oowooneya ntoko ooxeerya. Vano owo khumuyeeherya makhura yoowo, nto owo khwira, “Muluku omuthanlale yoola.” Munnona? Hiyo ninthanla mwaha wo wona. Muluku onthanla mukhalelo wa murima.

<sup>183</sup> Mukhalelo wa murima, khonakhaleke mukhalelo ntoko Yesu Kristu. Owo onkhala mwa nyuwo n'umooniherya Yoowo. Ninnoona wira ekeekhaii. Kahi ereerelo ya molumwenuni ya Yoowo enimuvara murima Mwakameliwa Awe. Ti mukhalelo wa murima Awe, mukhalelo wa Ekereja, Yesu omphavel'awe; kahi nipuro vari ipa suulupale, nipuro vari miromolelo suulupale, nipuro vari atthu anci-ene. Owo oolaiherya othukumana khula nipuro atthu aili wala araru anthukuman'aya vamosa. Vekeekhai. Ti vaavo mulipa-oowaamini eekeekhai onikhalih'awe nrromelo awe, ti vasulu va Masu a Muluku anlipiheriwa mwa Ekeekhai, yeeyo ekhanle. Muthanle ni Masu Awe, kahi nikhuru nimphenta olumwenku. Awo khenaasivela eyo.

<sup>184</sup> Khivanxankiha eyo omwalanaka ni Yoowo, okhala wira eyo yoopwetexa wiisuupulula Wawe, nto kherina. Owo khoncaliwa n'iyoy, enamuna eniiseettih'aya ni eniir'aya, ni kavi sa ithiru iya sa molumwenkuni eyo erin'aya.

<sup>185</sup> Owo omphavela mukhalelo wa murim'aya, mukhalelo wa Kristu. Vano, okathi vakhaani paahi vano. Ti yeeyo. Owo onimuthanla Mwaakameliwa onooniherya mukhalelo Awe, yeeyo ikereja sa vano s'olelo vekeekhai sinivony'aya otthara Wawawe—mutthokiheryo Awe va, imiilya emilyawu ntero, 'okhala wira awo anookhootta wira *Ala* ti Ekeekhai. Vano vaaweryaneyaya sayi okhala? Vano, Owo onwehererya nihiku Mwaakameliw'owo onrow'awe opakeya, aHeperi 13:8, siiso ntoko Eyo yaary'aya, ntoko Owo aary'awe. Ehaana okhala erutthu yeeyo Yawawe, makhuva mamosaru, Eroho emosaru, sothene imosaru, yotekiwa oratteene, vano awo oowaili nto ankhala mmosaru. Mpakha ekereja okhala yeeyo, awo kahi mmosaru. Mukhalelo Awe, Masu, a okathi ula, ohaana oheliwa mumphimoni. Owo ohaana oheliwa mumphimoni ntoko Owo siry'awe.

<sup>186</sup> Vano, kimalihaka, kintthuna kihimye mwaha ehimenry'aka itthu iya, nto kino—kinoomaliha. Ohiyu umosa, iwoora soophiyaka tthaaru voosiisu, kaaroovenya.

<sup>187</sup> Miyo kimmukuxa khula a nyuwo wira aakhule yeela. Kootoko wooleelani etthu p'itthu mwa Nsina n'Apwiya yahaakhanle ekeekhai? Kweekwe ennikkhalaka. [Muthukumano oniira, "Amen."—Mol.] Akikkhaliherye, Muluku oonisuwela wira ekeekhaii. Khaavo mutthu, hata nipuro nimosa molumwenkuni, wa itthu ikonto sene sinihimmwaka, Owo otonko awe ovonya nuulumo nimosa na yeeyo. Okathi wothene ehiiraneya voolikana.

<sup>188</sup> Hata okathi waary'aka oPhoenix, nihiku nlo, ahiiso yoovira eyaakha yoophiyaka emosa, nto koolenly'akani Mutthak'ole wa—wa *Mwaatthu*, *Okathi Xeeni Ula*? Nto kooleelani wira, "Malaikha Mathanu na maili yaamurowa okumana ni miyo weiwe," okhale otaphuliwa wa Ikanyeryo iya, ni sikina. Nto weiwe e—erevista *Life* khimukumiherya artiiku aya, Emwaleelo ele yuulupale yaawela osulu, voorakama ikilomo miloko mixexe ni thanu na tthaaru, ikilomo miloko miili ni thanu na piili epannte n'ipante. Khuhimmwa wira khayaaweryaneya otaphuleliwa wira yaari exeeni; nlelo khensuweliwa. Nto atthu akilante vaava mpaani muumu ohiy'ula, yaaphwanyaneya weiwe ni miyo okathi yiiraneieye aya, siiso Eyo yaahimaly'aya. Owo aahikileela itthu saarowa wiiraneya, nto khwiiraneya siiso. Moota khula emosa wa Ikanyeryo iye saataphuliw'aya, ni khukileela miiriirya saaipitihewe moovirani w'okathi ule w'anamarehererya ni sikina, voolikaneene.

<sup>189</sup> Moota, keemenle-ene vasulu va mwaako, alopwana, araru wala axexe a yaawo amphwanyaneya vaava naanaano, ayo, oovikana. Ewelaka mwaako, Eroho Yowarya khwira, "Muttotte nluku nle." Hiyo naamuxaya. Owo khwira, "Murihele osulu, khwira, 'SIISO ANIHIMYA T'APWIYA.'" Miyo khurihela. Vaavale khurwa efunttuli ekhaani y'etthekeu. Miyo khwira, "Muhina mwa iwoora miloko miili ni piili, munimoona ntata na Muluku." Axilopwana akilante vaava naanaano va.

<sup>190</sup> Mmeeloni mwaya, voophiyaka ewoora ya namuloko, keemenle-ene vaavale, miyo khwira, "Mwiilikanyihe. Mukele vathi va kaaro vale," mutokweene. Miyo khwira, "Ehanle okhumelela etthu." Waari osulu wo wooneela, vasulu saana veekhatoni. Khumora Mooro wiirukureryaka okhuma Wirimu, voonyakula saana saaweryaney'aya, khumana ixiri siisaale. Miyo—miyo kaaphwanyaneya vathi Vaya. Miyo khurula exapheyo aka, khuvarela muru aka. Khuvira vasulu vaka voophiyaka ovikana nuusu na meeturu wala emeeturu emosa ni vakhaani, khukumiha munyatta vaxirini vaavale siisaale, khuruma. Khutthikela osulu, khurukurerya-tho, khukhuruwa, vaara vararu, khutthikila hata vasulu v'etakwarikhwa, mpakha imeeturu emiya emosa ni miloko mithanu na miraru ni miraru. Munniwiiwa axilopwan'awo yiiraka, "Amen"? Awo yaari weiwo okathi ekhumelenly'aya, moone, khuruma vaara vararu.

191 Vakhumaly'aya vathi va ikaaro ni itthu sothene, khutthika, khwira, "Ele yoophwannenyeni-ru, khayaarowa ohala hata itathela."

192 Miyo khwira, "Aari—Aari Yoowo. Owo aalavula ni miyo." Muluku onlavula mwa eyuupuru. Munnona? Ni naahikhala Nlumi nenle na Mooro munoon'anyu valataratoni, naaphwanyaneya vaavale.

Nto okathi Nlo niwenly'aya, awo khwira, "Exeeni iyo?"

Miyo khwira, "Ehukhumu enimana Olimani Onikela nsuwa."

193 Nihiku na neili okhuma vaavale, Alaska aahalela opwina. Munnona? Yaahimana emaara emosa, wu, oruma woopacerya.

194 Weiwo, orina wiiriwa-wo etthu, wira wooniherye yeeyo. Ntoko mulopwana mmosa aahenle maakha mukahini, khurihela mmaasini, khwira, "SIISO ANIHIMYA T'APWIYA, ekhale maasi ooriirya." Nto mukina, Yesu, aakunxe maasi khuyeeherya mmunoni, khu—khupaka eviinyu ni yaawo.

195 Muhaana okhalana etthu, wira ethoonyerye. Ele yaari yeeyo, yaawenle osulu khukhuruwa. Eyo yaahipaceriha eyuupuru ile ekhaani. Muhina mwa iwoora miloko miili ni xexe, yaahittikinya mwaak'ole mpakha othala munyatta mwa yoowo.

196 Reverendu Mwenye Blair okilante va, kinimuweha yoowo naanaano va, owo aari vaavo khuttotta mapattuuxa kamosa-kamosa wa yoowo, ni siiso. Va ori Terry Sothmann, n'akina amphwanyaneya vaava, ni Billy Paul. Ni axinna, anci-ene w'ala akina akilante va, jaarisa vaavale vene wira yoone yiiranyaka okathi Eyo epwexakans'aya.

197 Kahi etthu yo wuupuwelela. Eyo ekeekhaii. Khayaari wu mahiku a Bibilia. Eyo naanaano va. Munnona? [Muthukumano oniira, "Amen."—Mol.] Muluku yoole mmosaru kweekwe onikoonihaka itthu iya, ni wiiranyeya, voolikaneene saana. Khasinatoko ovonyeya hata emaara emosa. Vano miyo kinniihimya ni Yoowo.

198 Isumana vakhaani sivinre, kaahikhalana yoowoona. Nto keemenle ni—nipuro nimosa noottukhuwa, ni kaari wira koone wooniheriwa wa Ekereja. Nto miyo khuweha, erwaaka wawaka...Kaarimweemela ntoko so, kiwehaka Onikela nsuwa. Nto naahikhala nikhuru n'axithiyana oophenteya naarwa epant'ila, yaawaranse ivistiitu sooreera saana, maihi oorakama ookhalihwiwa saana ottuli, miyoono, ni isaaya soorakama voophwanelela. Nto othene aya yaari ni weetta wo wiipa, ntoko, "Hayani, anakhotto aKristu, mweetteke ntoko orowa okhottoni, ni mwiikimanyo wa Yesu ohoolo." Okathi yaaviras'aya, miyo kweemela, nto yaahikhala Etthu vale, Eroho emosa, aari Muluku, khwira, "Mwaakameliwa ole vale."

Vano miyo khuweha, nto murim'aka waamutthapa. Nto Owo khurukunuwela epantt'*ila*, khuvira ottuli waka.

<sup>199</sup> Nuuvira okathi vakhaani, okathi ohokolonw'awe epantt'*ila*, Eyo khwira, "Vano ekereja ya vano enrowa wooniheriwa." Nto va khurwa ekereja ya wAsiya. Nkinatoko woona nikhuru noonanara.

<sup>200</sup> Va khurwa ikereja sikina, sa ilapo soohiyana-hiyana. Sooneya okhala soonanara.

<sup>201</sup> Nto miyo—miyo kinihimya ela okhala wira kihaana ohimya ekeekhai, ohoolo wa Muluku. Nto okathi Owo iiraly'awe, "Va enoorwa ekereja ya wAmerika vano, wira yooniheriwe," vakhala wira kootoko woona nikhuru n'axetwani, naari nenlo. Axithyan'ale yaari pwitipwiiti voomalela, ni etthu emosa yaakhala ntoko yoottweelela, ntoko nikhuli na etthepo. Nto yaavarelanse owiitho waya, ehirina epantte y'osulu nnakhala. Nto awo yiirasa etthu ntoko yeela, eyo, iyi—iyiinelo iya aximiravo ala aniinas'aya nno, onyokolowa iwo ni itthu, ni muthinto yoowo wa esipo orumaka. Nto okathi omonne aka Muhano Amerika arwaaka, kaahalela ohileya.

<sup>202</sup> Vano, ela ti SIISO ANIHIMYA T'APWIYA. Mwaakaaminiki okhala murumeyi Aya, mukaamini vano. Nkaakhanle ohimyaka eyo mahale-ene mulaponi. Khuuvo musurukhu oniphiiyerya molumwenkuni mothene wira okihimihe yeeyo yahaari ekeekhai.

<sup>203</sup> Nto vaviraly'aya, ele yaari etthu yoowooneya onanara kaatonko aka woona. Miyo khuupuwela, "Muluku, voolipaxa ntoko alaleyi ni hiyo axinna ninvar'ahu muteko wira noophwanyiheni Mwaakameliwa, vano ele ti yoomalela oreera ewenry'ahu wira." Eyo yaamunyokolowa, evarenleene *ela* ohoolo waya, ntoko emosa wa isaaya iya sa eyiinelo ya havai, evarenleene ohoolo waya ohoolo wa ipantte saya, epantte aya ya vathi, ntoko *sa*, yiinaka ni enyokolowaka ntoko anamwane ala nno wo...wootthekulani woohifayi awo arinas'aya, enyokolowaka. Owo aari Muhano oKristu wa wAmerika.

<sup>204</sup> Akikhaliherye, ni mukhaliheryo wa Muluku, iwo ti wooneya orin'awe wiitho Wawe. Miyo—miyo paahi... Miyo kinipacerya... Vaamuweryaneyi miyo ohileya. Miyo khuupuwela, "Wiilipiha wothene, ni olaleya, ni otumererya?" Khula mmosa a yaawo ni maihi oometthiwa, ni yaamunyokolowasa ni yiiraka voohifayi, evarenleene *ela* ohoolo. Awo khwaattamela, vaavo miyo kaary'aka vale ni Ookhala ola oovikana soopattuxiwa. Miyo nkaawerya omoona. Kaanimwiiwa Owo alavulaka ni miyo; ari vakhiviru saana ni miyo. Masi okathi arukunuwenlans'aya epantt'*ila* nno, awo yaavarenle *ela*. Nto enyokolowasaka paahi ni etheyaka ni ekelelaka ohoolo, yiiraka siiso, evarenleene *ela* ohoolo waya.



205 Vano, miyo kaaphwanyaneya Ohoolo Wawe vale, nto murumeyi Awe. “Ni wa sothene kiphavenly’aka, ele ti yoomalela oreera kiwenry’aka wira?” Miyo khuupuwela, “Muluku, eyo ekiirihale-nii? Ekiirihale-ni yooreera? Okhuwelela wothene, ni ovekela, ni otumererya, ni ithoonyeryo suulupale ni mitikiniho ni miirirya Nyuwo mooniheny’anyu. Ni moota kaakhal’aka vale, ni orowa owaani ni wunla nuumala waalaleerya ni itthu, nto ekiirihale-ni yooreera? Vano nto kihaana wooniherya etthu ntoko ele wa Nyuwo, ntoko Mwaakameliwa?”

206 Nto okathi waaphwanyaney’aka vaavale, kiwehaka, eyo khuvira. Nto munooverya othokelela epantte y’ottuli waya, ehiwanr’etthu, evarenleene *ela* ohoolo waya okathi yaavir’aya yuupuruwaka, siiso, onyokolowa nno, emwaryaka miyoono ni metto saya siiso. Nto, eyo, oh, yaari yoohifayi, moota yiiseettih’aya, erutthu aya ettikinyeyaka siiso. Vano miyo. . .

207 Nyuwo muniira, “Enihimya exeeni iyo, Munna Branham?” Miyo nkisuwente. Miyo kinoolelani ele yoonaly’aka.

208 Nto okathi eviraly’aya siiso, miyo khuweha. Oh, miyo vekeekhai kaahivolola. Miyo khurukunuwa paahi. Miyo khuupuwela, “Muluku, miyo koohukhummwa. Khiva—khivanthuneya miyo wehererya vano. Vanreerela kihyiye.”

209 Muhano Carl Williams, mwaary’ene vaava, ni yooloha ele mwaakihimenry’anyu, okathi ovinre, mwaalohaly’anyu ohiyu uwo, enoohaaxakani, eyo vo. Evulanti yaahikumihwa mmatatani mwaka.

210 Vano, miyo khuupuwela tu, “Vanreerela—miyo kiliyale yeela.” Kaahimalamala.

211 Vano, naanaanoru, miyo khwiiwa Eyo erwaaka-tho. Nto erwaaka epantt’*ila* nno khurwa Mwaakameliwa yoole aaronwe epantt’*ila*. Va khurwa axithiyana yaale-tho, nto khula mmosa a yaawo aawanre ekuwo y’elapo aya weiwo yaakhum’aya-wo, ntoko Suwiisa, Alemaanya, ni sikina, khula mmosa owanreene muthinto yoowo w’ekuwo, othene oorakama maihi, siiso ntoko ole wopaceryani. Nto va awo yaamoora, yeettaka. “Hayani, anakhotto aKristu, mweetteke ntoko orowa okhottoni.” Nto okathi othene avirans’aya vakaakoni voowoonihiriwa vaavo waaphwanyaney’ahu, naanaanoru, khula niitho khurwa epantt’*ile*. Vano nto awo khuhokolowa, khurwasa, yeettaka.

212 Nto siiso apaceny’aya owela wirimu, *ela* ekina khuwela okerekhere wa mwaako khukhuruwa, *siisaale*.

213 Ala khupacerasa owela yeettaka erowaka wirimu. Nto okathi arowans’aya yeettaka, kaahaaweha aximwali aili ottuli, yaakhala ntoko aximwali a ilapo s’okhopela, ntoko Suweesiya wala Suwiisa, wala nipuro nlo. Awo khupacerya owehaweha, n’ukhuma. . . Miyo khwira, “Muhiire siiso! Muhikhumele ota wa nivalo nlo!” Nto kikhuwelaka siiso, miyo khuphwanyaneya,

mwa yoowoona, keemenleene vale ni ntata naka kookonleene *siisaale*. Miyo khuupuwela, “Ahe. . .”

214 Tivo miyo kihimaly’aka ele ehimaly’aka, ohiy’ula. Kintthuna kookoheni etthu. Vahooxa ovikana sinuupuwel’ahu? Vaamuweryaneya Owo wira aihaniweene ni athanliweene, khutthittiwa ekanyeryo? Khonrowa okhala hata mmosa mukinatho, moosuwela. Vaamuweryaneya? Oh, ayo. Oh, ayo.

215 Muupuwele ehimaly’aka, nihiku nikina woolyani wa voosiisu. Mw’ekhittani y’ophitaana oolopwana ni oothiyana, sookhala iropo emilyawu sinkhuma, mooce emilyawu ankhuma. Masi eri emosa aya enkhala ekumi, ni, nnya, othene anoolikana: emosa wa emilyawu. Khula mmosa, nooce nimosa ni muthinto mmosa wa eropo. Emosa enookhala. Sikina saya sinimookhwa.

216 Khaavo onwerya ohimya ti nvi nikhanle nooce noottokottha, ni, oh, etthu ya nenlo. Muluku ohaana ohimya, nkhamana onrowa okhala mwaana mulopwana wala muthiyana, a ncano wala ooriipa, wala khula onrowa okhala. Muluku t’onihimya yeeyo. Kahi ole oopacerya ophwanya, masi ole Muluku onipacery’awe omuhimya. Khino mmosa onoorwa *va*, ni mmosa. . . Vakhala wira mootoko oweha, mmulithini wo weeherya, owoona erwaaka vamosa. Miyo kootoko oweha. Muluku ohaana ohimya yeeyo. Mmosa, khula mmosa a yaawo, oolattana tu, masi mwaha w’othanliwa. Oyariwa w’ephattu onkhala mwaha w’othanliwa. Muluku onimukuxa mmosa mwa emilyawu.

217 Okathi Isarayeli okhumaly’awe wEjitu, erowaka muttethe wa natiri, awo yaarisa oophiyaka atthu imilyawu piili. Khula mmosa aari vathi va mukuttho mmosaru wa mwaapwittipwitthi, weso khayaarowa okhala. Khula mmosa aahimuwiriyana Moise, profeta. Khula mmosa aahipatsiwa mwa yoowo, Mphareya Yooxeerya. Khula mmosa aahiina, athiyana ni Miriyamu, nno ni nno wa (okathi) muxerexere mw’ephareya, okathi Muluku aamuhukhummu awe nwanani. Khula mmosa aahikhala ni Moise, khumwiiwa aipaka mwa Eroho. Awo, khula mmosa, aahilya emana mothakoni, yaamora okhuma Wirimu. Emananya, khula ohiyu, yeeyo ekhanle nlikanyiho na Mutthaka, khula mmosa aahilya yeeyo. Masi, mwa imilyawu piili, akavi yaakenle? Aili. Mmosa mwa emilyawu emosa.

218 Aakhala aKristu oophiyaka imilyawu emiya mulaponi ohiy’ula, waatakanxa ni aKatolika ni othene. Atthu imilyawu imiya thanu aniihaniwa alipa-oowaamini mulaponi. Vaakhanle wira Okuxiwa waamwiiraneya ohiy’ula, eyo yaarowa ohimya wira. . . vaakhanle wira mmosa mwa emilyawu ti yaari ekhumelo. Nkinihimya wira ti siiso. Masi vaakhanle wira t’iry’aya, atthu imiya thanu, iwoora miloko miili ni xexe sinttharelana, yaamuhaleela. Nyuwo khamwaarowa wiiwa hata ehapari ya yeeyo. Anookhala eyaattelo yeeyo anihaleela, khula enamuna, hata vahinweryaneya ohimmwa.

219 Nto vaamuweryaneya okhala, onikhumelela, mpatthani, ntoko siiraneiy'aya okathi Yohani Mpatisa aarwiiy'awe. Hata awiixutti yiirale, "Soolempwa sinihimerya-ni, mwaha wa xeeni a—arummwa ahiiso maprofeta ohimyaka, anihimerya-ni wira Eliya ohaana opacerya orwa areherye itthu sothene?"

220 Owo khwira, "Kinooleelani wira Eliya ohoorwa, nto nyuwo khuhisuwela."

221 Nihiku nlo vaamuweryaneya hiyo ohiiwa nikilanthene-ene va, "Ankhi Okuxiwa ohaawa ohinatthi okela?"

"Ohoorwa nto nyuwo khuhisuwela."

222 Erutthu yothene, ethhitiwe-ene, ekhalihaka Yeeyo munivaloni. Nkinihimya wira ti siiso. Kinroromela wira kahi siiso. Masi, mpatthani, eyo yataphularu . . .

223 Yakhala etthu enoon'ahu mmurimani mwahu, ohiy'ula, wira naahaana oreherya makhalelo ahu, ni itthu siniirak'ahu, mukihye koolopoleni, ntoko munna murumeyi. Kinrowa ohimya ela emaara yoopacerya, vapulpitu. Miyo kookeleliha ohoolo ohiy'ula, mwa *Yeela*, ovikana etthu p'itthu ekina, mwa khula okathi, khula enamuna, ohoolo w'atthu, okhala wira kinnikhalanaka otaphuwa wuulupale mmithukumanoni seiya. Mwaaminiki vale wira ka profeta a Muluku, mwiiwelele yoohimenry'akani. Yaakhanleene emanelo yaamukhaani mmurimani mwanyu, murowe wa Muluku naanaano va. Mwiire yeeyo.

224 Mweemele minuutu mmosa paahi, alopwana. Nwehe sawinyu—iyaaminelo sanyu munrumeel'anyu. Nwehe ikereja sanyu. Eri voolikana-ene ni Masu a Muluku? Moomaliherya khula etthunelo? Muniira, "Miyo ka mutthu ooreera murima." Nikotemu aari siiso, ni othene aya akina yaari siiso. Awo—awo yaari ooreera murima. Munnona? Eyo khena naata n'Iyo.

225 Ni, athiyana, kintthuna mwiiwehe muloolani, nto nwehe ele Muluku ontthun'awe wira muthiyana iireke. Ni moone muloolani mwa Muluku, kahi muloolani mw'ekerej'anyu vano, muloolani mwa Muluku; nto moone sinto mwaamuwerya ovira, mwa makhalelo anyu, Mwaakameliwa a erooho a Yesu Kristu.

226 Arumeyi, muupuwele siiso. Nyuwo munoovukula itthu *va*, wira mwiinanele moonelo wa mutthu ohoolo waya? Mwaamwiira *yeela* yahaari. . . nto mwaamoomoliwa mukereja? Moonakaru siiso, munn'aka oophentiwa, mukihye koolopoleni, mwa Nsina na Yesu Kristu, mutthyawe yeeyo naanaano va.

227 Ni, muhano, mwaahiweryeke ophiyerya mphimo wa muKristu, kahi ntoko muKristu a nsina, masi mmurimani mwanyu, ni makhalelo anyu etharihaka oratteene epaphelo y'othelana ya Muluku, va, enihimy'aya wira ehaana okhala . . .

228 Ni, mutthu a mukereja, ekerej'anyu yaahikhale siiso, yaahiweryeke ophiyerya mphimo wa Muluku wa Masu Awe, mukhume-mo mukele mwa Kristu.

229 Owo mulopolelo wa nttittimiho. Hiyo khaninsuwela okathi ene, ni nyuwo khamusuwenle okathi ene, epoom'ela nihiku nimosa enrow'aya ophwanyaneya nno vathi v'ephareya yuulupale.

230 "Oh, Kafarnawu," ohimmye ti Yesu, "nyuwo muniisinnuwaha mpakha wirimu, munookuruxiwa mpakha omooroni. Maana, yaarookhala wira miteko suulupale saahiiriwa oSotoma ni Komora, waamukhala mpakha olelo." Nto Sotoma, Komora omphwanyaneya vathi va Ephareya Yookhwa. Ni Kafarnawu ori vathi v'ephareya.

231 Nyuwo muttethe, munihimya okhala muttethe wa Malaikha, muniisinnuwaha mpakha wirimu, ni oveleeliha itthu sothene, soottakatta ni soonanara sa mihapo ni itthu, mpakha ilapo s'okhopela sinrw'aya wenno ottotta soonanara sahu n'uroiha, hata ikereja sahu sooreerexa ni anamukattha, ni sikina, enamuna muniir'anyu. Muupuwele, nihiku nlo munrowa okhala vathi v'ephareya, ovonya wanyu wuulupale ntoko nihavo n'oravo vathi vanyu naanaano va. Oviruwa wa Muluku onopa ekhanana vathi vanyu. Okathi zeeni-tho Owo onrow'awe ovarelela ekulu ila ya mihaava ehamenleene vaavo? Okathi, epharey'ele yuulupale iwe, yoowiixa emiilya emosa, enrow'aya othereneya vale, mpakha ophiya Ephareya Salton. Enrowa okhala yootepa ovikana nihiku nookiserya na Pompeya. Murukunxe murima, Los Angeles.

232 Murukunxe murima, nyuwo akina, mutthikele wa Muluku. Okathi w'oviruwa Wawe ori elapo ya vathi. Mutthyawe ory'ene okathi w'otthyawa, mukele mwa Kristu.

Nivekele.

233 Muluku ootthuneya, muroohoni mwaka, munooakhinyeya, murim'aka ommora maithori oolopola. Munivahe, O Muluku, wira alopwana n'athiyana ehupuwele wira ehimaly'aka eperwaa, ni athu a mukereja ehupuwelele yeela ntoko etthu y'ethiru wala ya nthowa n'awo. Awo yoone, Pwiya, wira eri mwa ophenta.

234 Nyuwo munnikikhalelaka onamoona, Muluku Oowerya sothene, wira kinnirowaka epantte emosa n'ekina ya epharey'ela, eyaakha ti eyaakha, kilaleeryaka Masu Anyu. Mukivahe onamoona, O Muluku, yairaneya ohiyu yoola, miyo kihimmye Ekeekhai. Nyuwo moosuwela wira yoowoon'ela ya Mwaakameliwa Ekeekhai. Miyo kikunxe Nsina Nanyu wa yeela, Pwiya, ni khuhimya wira yaari SIISO ANIHIMYA T'APWIYA. Ni kinnoona wira kinnisuwela, Pwiya, eniir'aka.

235 Tivo miyo kinoovekelani Nyuwo, Pwiya, mwa Nsina na Yesu, mwaahiye athu yitathe, ohiy'ula, ethyawwe oviruwa

onihalela orwa, Ikabodi oolempwa vasulu va mikhora ni va ilapo. Ekanyeryo ya okhoottiwa yooheliwa khula epante ya yeeyo. Eroho ya Muluku yooriipihiwa murima mwa yeeyo khurowa, nto awo aaphimiwa vapalansani khuphwanyiwa ehaleelaka. Niira na Mwene Napukutonosoori nootthikela-tho, ni maira oohapaliwa ni athiyana oohalaka ohiwar'etthu, aniisihana aKristu.

<sup>236</sup> O Muluku a Wirimu, mmorele ikharari olumwenku w'etampi ni atthu anatampi, Pwiya, ntoko siry'ahu ohiy'ula. Muluku, kineererya weemela v'ephakani n'uvekela omoreliwa ikharari wa Muluku, wira Nyuwo mulavule ni muttitthi ula w'atthu ohiy'ula mmwiihane Mwaakameliwa Anyu wira atthokelele, Pwiya, wira eetteke woohikhala ni ethoonyeryo ya eyaaminelo, masi mwa nsu na Ehapari yooreera ya Pwiya Yesu Kristu. Munivahe, O Muluku. Esuweliwe, ohiy'ula, wira Nyuwo mwa Muluku, ni Masu Anyu ti Ekeekhai. Okathi, ni nttittimiho, ohoolo w'atthu ala, hiyo ninniwiianela otthokelela Masu Anyu.

<sup>237</sup> Mwa Nsina na Yesu Kristu, miyo kinnaavekelela, Pwiya. Awo aawoonani, voohikhala hata ohoverya, weetteetta epante t'ipante varyari va mittitthi saya ni waaleela etthu eri mmurimani mwaya. Ni Nyuwo moosuwela, Pwiya, yeeyo, naanaano va, enikhumelela. Nyuwo moosuwela wira eyo Ekeekhai, O Muluku. Nto kinoovekelani Nyuwo, mwa Nsina na Yesu, muhiye Eroho Yowarya elapele-tho, Pwiya, ni yaakumihe vamuthukumanoni va, Pwiya, ale alempwe muLiivuruni mw'Ekumi ya Mwaapwittipwitthi. Munivahe, O Muluku. Kinvekela ni murim'aka wothene.

<sup>238</sup> Atthu ala, voohivila, Pwiya, yaamukivaha esentavo aya yookiserya awo yaarow'aya okhalana, wira ekhaliherye Mutthaka. Awo yaamwiira etthu p'itthu yaarow'aya owerya. Masi, O Muluku, naahimyaka okupali Yoowo, ni okela mwa Yoowo, miyo kinnivekela, Muluku, wira ola okhale ohiyu Nyuwo munrow'anyu waatthuvula ni omwarexa Eroho Anyu Yowarya vamuthukumanoni va. Ni wira ohikhale hata othweela wala otupha-tupha, masi wunla ni ovekela, ni orukunxa murima, ni ovarela oxerexere w'altaari, okathi onoon'ahu olamuliwa okhuwelelaka vathi vahu, ohiy'ula. Munivahe, Muluku. Kinvekela vaxariya-vo ntoko sinsuwel'aka, mwa Nsina na Yesu Kristu.

<sup>239</sup> Munn'aka mulopwana, muthiyana, miyo—miyo nkinsuwela-tho y'ohimya, kareeriwa vale vamaithoni vanyu, ni owerya wa Muluku, mwaaminiki vale wira ka profeta Awe. Ela emaara yoopacerya v'atthuni kihimaly'aka yeeyo. Masi kinnoona olopoliwa wa enamuna emosa wootikiniha. Miyo nkiihiyo oosiveliwa ni yeela. Nyuwo moosuwela wira nkiihiyo. Miyo nkiniira siisa. Miyo kaahithananela olavula Mutthak'owo ni ohimya itthu iyo. Miyo kinnihuluwa ni itthu sikina, wira kiihire. Masi Eyo yoohimmwa, ni Eyo enookhumelela Nihiku

n'Olamuliwa, ntoko namoona wira kihimye Ekeekhai. Eyo ti SIISO ANIHIMYA T'APWIYA MULUKU!...?...

<sup>240</sup> Oh, aPentekosite, mutthyawe mwaha w'ekumi anyu. Mutthyawe oxerexere w'altaari nvekele, wahinatthi oxa, okhala wira onimoorwa okathi munrow'anyu ovekela nave khunrowa ophwanyiha etthu. Maana Esawu aahiphavela ophwanya opuro, w'eyuulupale awe, nave khaawenrye ophwanya. Miyo kinnoovahereryani, oh, California. Oh, muthukumano w'Alipa a Nakoso a Ehapari yooreera Yoomalela, nyuwo onoophent'akani, nyuwo miyo kinihiy'aka itthu ni wiiraana-no, ni murim'aka wothene, kinnoovahereryani wa Yesu Kristu, ohiy'ula. Mutthyawe wa Yoowo! Muhimuhiye xetwani wooriirihani wa Yeela. Mukhale ni Yeela mpakha, othene, mukhale oosareya Eroho Yowarya, wira, yooruuheni mwa Masu ala, enrowa owiirihani nyuwo athiyana wiilokiherya, enrowa owiirihani nyuwo alopwana wiilokiherya. Mwaahimyaka wira mookhalana Eroho Yowarya, nto khuhinaiwanana ni Masu, eyo erooho ekina mwa nyuwo. Eroho ya Muluku eri mwa Masu Awe, a oMesiya, Masu ooreerihwa. Mwaakameliwa ohaana okhala Mesiya mwaamukhaani, Masu ooreerihwa.

<sup>241</sup> Nrowe nivenye neemele, mwa Nsina na Pwiya Yesu Kristu. Mwaahiiwe-tho nsu naka...Masi, Muluku atthuna vale, kinrowa wAfrika, muhina mwa iwoora vakhaani. Pooti ohitthika-tho. Nkisuwenle. Masi kinooleelani, ni murim'aka wothene, kooleenleni Ekeekhaii. Nkihiyale wooleelani sothene Muluku okileenly'awe wira kihimye. Ni kihimye mwa Nsina n'Apwiya.

<sup>242</sup> Ola okathi woottittimiheya. Nkinsuwela moota wo ohimya. Kaahiphavela ohiya epulpitu imaara tthaaru wala xexe, nave nkinwerya wira. Ola okathi woottittimiheya. Muhikhalakhale muliyalaka. Ola okathi, khino, Muluku oniir'awe mwiihanelo Awe wookiserya. Miyo nkisuwenle. Owo onimwiira mwiihanelo Awe wookiserya, nihiku nlo. Liini? Miyo nkisuwenle. Masi kinooleelani wira, nittharihaka yoowoona ele, enkhala ntoko Mwaakameliwa owo ohanle omalela.

<sup>243</sup> Nkawehani ikereja soowiiromola okela. Okathi mwali aarumpe aarwenly'awe Makhura, owo aahivonya ophwanya Yaawo. Mwaakameliwa aahikela. Okuxiwa waahiwela. "Okathi awo yaarowaly'aya othuma Makhura, Mutheli aahirwa."

<sup>244</sup> Munoorupa? Nvenye, mwaakuve, mwiitthikele mmansinyu. Ni nrowe nivekele, khula mmosa, ntoko wira naakhwa okathi yoola, mwa Nsina n'Apwiya. Nrowe, khula mmosa, mwa enamun'awe.

<sup>245</sup> Muluku Oowerya sothene, munimorele ikharari. Pwiya, mukimorele ikharari. Munimorele ikharari hiyo othene. Eniphwanyihani yooreera, hata niiraka exeeni, navonya mwa itthu iya? Miyo kinoovenya n'uvekela omoreliwa ikharari, O

Muluku, mutteth'ola muulupale ohinatthi opwina mphareya ni ihukumu sa Muluku ovela epharey'ela. Miyo kinnivekela, Muluku, wira Nyuwo mmwihane Mwaakameliwa Anyu. Miyo kinaavahererya wa Nyuwo, mwa Nsina na Yesu Kristu. Amen.



*OMUTHANLA MULIPA-OOWAAKAMELIWA* EMK65-0429E  
(The Choosing Of A Bride)

Mutthak'ola wa Munna William Marrion Branham, opaceryawene olaleeriwe ni Enkelesi Namaxexe ohiyu, mahiku yeettaka 29 mweeri w'Abril, 1965, mwa wa Opatthana wa Mulaponi mothene w'Alipa a Nakoso a Ehapari yooreera Yoomalela oBiltmore Hotel oLos Angeles, California, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)